

# 1 KINI

Isaraele wambunya kini dupwana monaki lenge dokona arome pii buku Samyuele dolapona lenge dokonako ingyuo wambo lao dakena opetae lao pyasi palamo. Buku dake mendaki dokona pii rema liti pyuo pyasi palamo.

1. *Rombo 1-2* Dapiti kumuyamo dokopa banya Isaraele Jutape wambu dupwana kini ingyuo panda doko banya ikinyingi Solomone lenge dokome nyiya.
2. *Rombo 3-11* Liti dakena Solomonena iso kareyamo dokonape banya yulu andake piyamopape dupwana pyasi palamo. Yulu mupwa mende doko Anatunya tembole anda yuu Jerusaleme dokona piya.
3. *Rombo 12-22* Dapiti Solomonepana isingi yuu mendaki ingiyamopape arome pii dakena isingi yuu lama ingiya doko palamo. Yuu gii dokopa piso kini dupwame iso karo kumapa pyuo Yesu epara doko ee kana 850 ene paleyamo dokopa kaeyami. Make dokome ee kana dusipa Yesu isa epara doko ene palemopape mende piya doko lasaka pira 850 W.K. W.K. wambo Koraisa lao palipyamo pilyamo.

Buku Kini lenge dolapona Isaraelena kini mendaki mendaki lao baa apa pyuo Anatu leyamuli pyuo kareyamo dokona lao yapalyuo pyasi palamo. Kini dupwame Anatu leyamuli pyuo kareyami ramo dokopa isingi yuu peparae kapa ingyuo peya. Dee Anatumi leyamuli pyuo pii nao

Anatu kaepala bange wakale dupwa anatu ingyuo kingi leyaminyi dokopa yuu doko kwaeyo peya.

Yuu Isaraele lenge dorena isiyaminyi kini dupwa peparaeme Anatunya pii kamba lao kareyami. Dopa piyaminyipa yuu Juta dorena isingi kini dupwana lapome Anatunya pii au pyuo warombo soo kareyaminyi lapome Anatunya pii kamba lapala mee bange lapo Anatu lao lakando kareyami.

Buku 1 Kinji dokona Anatunya poropeta akali dusipa mupwa ingyuo kareyami. Karapala dokopa Anatunya pii lao karenge akali dasipa akali porai ingyuo karo wambu dupwa Anatu kaepala bange wakale dupwa ketae pyambwa nana lao Anatu pii letamuli pyuo pinya lao repe repe lamaiyuo kareyami. Poropeta akali mupwa Ilainja lenge dokome mee bange kingimi wasisi Bealo lenge dokona purisi akali dupwa nyuo anamasi minyuo kareyamo arome pii doko rombo 18 dokona pyasi palamo.

### *Kinji Dapiti Ando Kaeyo Kareya Doko*

<sup>1</sup> Kinji Dapiti baa ando emo ingiyamo dokopa banya kendemande akali dupwame porange-lye yambe piyaminyipape baa mee kupwame kumuoko palyuo siya. <sup>2</sup> Dokopa banya akali mupwa dupwame baa lamaiyuo dopa leyami. Emba kini andake doko, namwame enda mapwae mende embapa role pyao palyuo emba rapu pira kotakamanale. Kota kando nyakaramano dokopa wanake dokome emba kupyaro paliramo emba kupwa nao paliri, leyami. <sup>3</sup> Lapala nakamame Isaraele yuu muu dupwa peparaena

enda mapwae keyange mende petape lao koto kareyami. Koto karo yuu Suneme lenge dokona wanake mende kingi Apisake lenge peteyamo kando nyiyami. Nyepala baa lanyuo kinji peteyamo dokona peyami. <sup>4</sup> Peyaminyipa enda mapwae ama keyange wakasa dokome kinji baa iso rapu piya. Dopa piyamopape enda dokopa angi nyii nao mee palyuo kareyambi.

### *Atonainja Kinji Karalana Leya*

<sup>5-6</sup> Dokopa akali Epesalome baa kumuyamo dokopa akali Atonainja lenge Dapiti Akitipana ikinyingi doko wane mupwa doko baa kuma nao mee lete ando kareya ingiya. Baa akali elyape ingyuo ando kareya Dapitimi wane doko pyalana pyuo laa nange. Dokona Atonainja baa kinji karapuli lao suu pyao kareya. Baame mename uliuli ipyuo pengepe mena osepe dupwa baa rangena lao reteya. Dee baa rapu pirami akali dupwa akalisa kingi paki karo piyami. <sup>7</sup> Baamoo akali Joape enda Seruyana ikinyingimoo purisi akali Apiatamoo role pyao pii lao kareyami. Kareyaminyipa nakamba pipya lao banya yulu dokona renga palyuo poraiyuo lakamiramba, leyambi. <sup>8</sup> Dopa leyaminyipape purisi akali Satokomoo Benaya Jiyoatana ikinyingimoo dee poropeta Netanemoo Simaimoo Oraimoo dee Dapiti banya yongo rapu pyuo karaminyi akali dupwamepe Atonainja banya pii leyamo dorena kara nayami.

<sup>9</sup> Yuu mendepa Atonainjame bange mena sipisipipi bulamakaope dee mena bulamakao yakane rondo lasipi lapo Kau Kana lenge dokona

ipwa Enerokele guu lenge doko repeta kiso maiya. Maipala baame kinji Dapitinya ikinyingi menge dupwape dee kinji Dapiti banya akali mupwa yuu Juta range dupwape nenge malu palyuo kisiyamo dokona epena leya. <sup>10</sup> Leyamopape banya yangonge Solomonemoo poropeta Netanemoo Benayamoo dee kinjinya yongo rapu pyakamyuo karengge dupwape epena laa naya.

### *Solomone Baa Kinji Rombo Palyiyami*

<sup>11</sup> Enakana Netane baa Solomonena endangi Betesepa lenge peteyamo dokona papala baa piso soo dopa leya. Emba Akitinya ikinyingi Atonainja baa rangeme kinji karalana lao rombo palyapya doko see napisi? Dokopa kinji Dapiti pii dokona mendepe ama see nalyamo, leya. <sup>12</sup> Embame embapa embena ikinyingi Solomonepa range lete kyawa doko kame pyuo minyaramba lao masiyambi kande doko nambame pelapa lao langirunuli pyuo pelapape, leya. <sup>13</sup> Yuu gii aopa dakepa kinji Dapiti petamo dokona papala piso soo lao, Emba kinji andake doko, embena panda doko nambana ikinyingi Solomoneme nyepala baa kinji ingyuo karara lao lalu lao lao namba langya naese? Dokona lao, Akipamo akali Atonainja baa kinji karase? leya. <sup>14</sup> Dopa lapala dokopa Netaneme konda pyuo lao dopa leya. Emba kinji Dapitipa pii lao kararambi dokopa nambame epapala embame pii letene dokonako lareneli pyuo kamba laokondali pyuo lakaro, leya.

<sup>15</sup> Dokona lao Betesepa baa kinji banya luu palenge panda paleyamo dokona kandala peya. Peyamo dokopa baa ama alemo ingyuo oteya.

Dokopa yuu Suneme range wanake dokome kandokondali pyuo rapu piya. <sup>16</sup> Dokopa enda Bete-sepa baa kinji paleyamo dokona lenge kambusa pangu siya. Dokopa kinji dokome baa piso soo lao, Emba aki nyereese? leya.

<sup>17</sup> Enda dokome isingi lamaiyuo dopa leya. Emba kinji andake, embame embena Kamongo Anatunya kingi lao lalu lao lapala nambana ikinyingi Solomone baa embena mata kinji ingyuo karara lao namba kando lee kande leya. <sup>18</sup> Dopa leenepape Atonainja baa kinji karo otapya dokona mendepe emba see nalene kande. <sup>19</sup> Baame mena bulamakao kali malupi mena sipisipipi dee mena bulamakao ikylene rondo lasipi lapo pyao yangapala embena ikinyingi dupwape purisi akali Api-atamoo dee Joape embena yanda singi ami dupwana mupwa ingyuo karengere dokomoo epena lapala embena ikinyi Solomone iki epena laa napyapya, leya. <sup>20</sup> Emba kinji andake doko Isaraele wambu peparaeme apimi embena panda nyuo kinji karena lao langilipi lao embako isaro karaminyi. <sup>21</sup> Embame laa nare ramo doko emba kumaparene dokopa nambana ikinyingi Solomonepa nambapa emba mata kando lao kararambi lao wambu dupwame suu pyarami, leya.

<sup>22</sup> Enda doko mee pii lao kareyamopako akali Netane baa kinjinya anda dokona epeya. <sup>23</sup> Epeyamo doko dopa pyuo poropeta doko epo karamo lao kinji doko lamaiyami. Dokopa Netane baa andakare papala kinjinya lenge kambu dokona isa pangu siya. <sup>24</sup> Sepala baame lao,

Emba kinji andake doko akali Atonainjame doko embena panda nyuo kinji ingyara, lapisii? <sup>25</sup> Yuu gii mendaki dokopako baa mena bulamakao kali malupi sipisipipi mena bulamakao yakane rondo lasipi pyao yango maiyala paamo. Papala baame embena ikinyingi dupwa peparae epena lapyaa. Lapala Joape embena ami yanda singi dupwana mupwa dokope Apiata purisi akali dokope pipala epena lapyaa. Lapyamopa epapu dakepa nakama baamoo pipya role pyao piso nenge nao pii ketae palyuo poraiyuo lao Atonainja emba kinji ingyuo palyuo karalu karape, letaminyi. <sup>26</sup> Dopa pipyamopape nambamoo purisi akali Satokomoo Benayamoo dee Solomonemoo nenge nala ipupwa laa napyaa. <sup>27</sup> Embame yulu doo pipyamo dupwa kando kapa lao suu pyapala embena akali mupwa dupwa kando lamaiyuo, Embena kinji yulu doko apimi nyera lao lamai naese?

<sup>28</sup> Kinji Dapitimi enda Betesepa baa dee kapu kyuuo epena leya. Dopa leyamosa enda baa epapala Dapitinya lenge kambu siyamo dokona kareya. <sup>29</sup> Epo kareyamo dokopa Dapitimi enda lamaiyuo dopa leya. Nambame Kamongo lete karalu karenge dokome namba randa malu nao kareyonopa kiiramo nyiyamo dokona kingi lao lalu lao lao, <sup>30</sup> Epapu nambame emba kando Isaraele wambunya Kamongo Anatumya kingi dokona lao embena ikinyingi Solomone baa nambana panda nyuo kinji ingyuo karara lao lalu lao leyo kande doko alowa pii naro, leya.

<sup>31</sup> Leyamo dokopa Betesepame pangu sepala lao, Nambana kamongo baa karalu karena leya.

<sup>32</sup> Leyamo dokopa kinji Dapitimi akali Satoko Netane dee Benayamoo epena leya. Nakama epeyaminyi dokopa baame akali dusipa lamaiyuo dopa leya. <sup>33</sup> Nakamame nambana yulu pyakange akali mupwa dusipa nyuo lanyuo nambana ikinyingi Solomone baa nambana mena ose matana piso papingi dokona petena lapala lanyuo ipwa guu lao epenge yuu Giyone dokona pupwape. <sup>34</sup> Yuu dokona Satoko Netanepame baa Isaraele wambunya kinji karena lao kyawana mamba kisakamirambi. Dopa pirambinyi dokopa bikuli poo lao pii poraiyuo lao lao, Kinji Solomone doko palu karalu karara lena, leya. <sup>35</sup> Lapala baa anda kapu kyo nambana kinji ingyuo petenge seya dokona pisa epeya kande dokopa baa eparamuli pyuo ipupwape. Nambame Solomone baa mupwa ingyuo nambana panda nyepala Isaraele wambupi dee Juu wambupi iso karara lao rombo palyiyu dokona baa nambana panda alowa pyuo nyera, leya.

<sup>36</sup> Benayame isingi lao, Embame letenyili pyuo pirama. Dokona Kamongo Anatumi emba letene doko kapa lena, leya. <sup>37</sup> Emba kinji andake doko, yulu pyuo karene dokopa Kamongo baa emba nyiso role kareya dopako pyuo Solomone nyiso kararamopa emba kinji yulu piinyi andanyi pyambuyamopape banya yulu pyuo wambu isaramo doko kamame ulipili ingyuo ando para, leya.

<sup>38</sup> Lapala Satoko Netane Benayamoo dee akali kinji rapu pyuo kareng'e dusipame Solomone baa kinji Dapitinya mena osena mata dokona petena lapala rapu pyuo lanyuo ipwa guu lao epenge yuu Giyone dokona peyami. <sup>39</sup> Papala Satokome

olipi ipwange petenge penge Kamongona komau anda dokona nyuo minyuo peyamo doko nyepala Solomone kinji ingyuo karena lao mamba kisakamiya. Kisakamipala dokopa nakamame bikuli pii poo lao wambu peparae pii poraiyuo lapala Solomone baa kinji ingyuo karalu karena leyami. <sup>40</sup> Lapala nakama peparae Solomone epeyamuli pyuo kapu kyo epo rae maiyuo pii ketae palyuo lao kurulu dupwa lao pii poraiyuo lao epeyaminyisa yuu dupwa pyuku pyuku leya.

<sup>41</sup> Atonainjamoo dee banya upunili wambu dupwa peparaepe nenge nao oteyami dokopa pii poponge doko siyami. Dokopa Joapeme bikuli pii leyami doko sepala dopa leya. Aki rengendena yuu taone dokona pii palase? leya. <sup>42</sup> Pii lao otapa nayamopa Jonatane purisi Apiatana ikinyingi doko epeya. Epeyamo dokopa Atonainjame baa lamaiyuo lao, Akali keyange doko, pii keyange mende minyuo epenge epelenenje andakare ipu, leya.

<sup>43</sup> Dokopa Jonataneme isingi lamaiyuo, Kondo. Nambame pii angi mende minyuo epa nalyojo. Doko kinji Dapitimi banya kinji yulu Solomone nyinya lao rombo palyapya, leya. <sup>44</sup> Kinji Dapitimi akali Satoko Netane dee Benayamoo dee banya akali baa rapu pyuo karengge dupwape pipala Solomone rapu pyuo iso nyela pena lapyo. Lapyasa akali dusipame baa kinjinya mena osena mata dokona petena lapala lanyuo pumi, leya. <sup>45</sup> Papala Satoko Netanepame kinji karena lao ipwa guu lao epenge yuu Giyone dokona kinji wasambipya. Dopa pipala dokopa baa lanyuo yuu taone dokona rae maiyuo pii poraiyuo lao pumisa



dokome yuu doko wambu dupwa kilyipu kilyipu karaminyi doko emba selenelyamo. <sup>46</sup> Solomone baa epapu kinji ingilyamo, leya. <sup>47</sup> Dee mende palamo. Dapitinya yulu pyakamingi akali mupwa dupwame kinji Dapiti baa ketae pyambwala papala dopa leyami. Embena Kamongo Anatumi Solomone embapa manda manja naramopa baa mupwa wakasa ingyuo karena lena. Baame iso kararamo dokopa elyape wakasa ingyuo pena, leyami. Dokopa kinji Dapitimi banya luu palenge panda dokona pangu soo Anatu ketae pyambuo lakando atenja leya. <sup>48</sup> Lapala nakama lamaiyuo, Kamongo Isaraele wambunya Anatumi nambana ikinyingi dokona mende kinji karena lapala nambame kando karape letamo dokona baa lakandamana, leya.

<sup>49</sup> Dokopa Atonainjana upunili wambu dupwa pakapala nakama sipuro yoko lapala kata wakale wakale dupwana peyami. <sup>50</sup> Atonainja baa kinji Solomone kando pakapala Kamongona komau anda dokona konando papala Anatu mena pyao kiso maingi kana pyare laro karengi dokona papala pinjingi dusipa minyaro kareya. <sup>51</sup> Karapala baame dopa leya. Kinji Solomone namba pyao kumasa naro lao wambo lalo lao lena lao karamo leyami doko kinji Solomoneme soo kareya.

<sup>52</sup> Sepala Solomoneme isingi lao, Baa kapa warombo soo rape rape lao karara ramo doko banya kyawasi dokona kuki mendepe minyanda narami. Dopa pii nara ramo doko baa kumara, leya. <sup>53</sup> Lapala dokopa kinji Solomoneme akali Atonainja lanyuo lano epena leya. Dopa leyasa Atonainja baa kinji kareyamo dokona epapala wa-

pambu pii pyao pangu siya. Dopa piyasa kinji Solomoneme baa anda pena leya.

## 2

### *Dapitimi Solomone Pii Lao Lumwa Pyuo Mana Lamaiyamo Doko*

<sup>1</sup> Dapiti baa oo repeta kumara ingiyamo dokopa banya ikinyingi Solomone epena lapala mana pii lumwa pyuo dopa lamaiya. <sup>2</sup> Nambana kumarono yuu gii doko repeta epelyamo. Dokona emba kando porayapala akali ingyuo karape. <sup>3</sup> Karo dokopa embena Kamongo Anatumi aki mende pii lao laramuli pyuo pyuo karape. Banya mawa pii dupwa Mosesena lowa pii dokona pyasi palamo dupwa warombo soo minyuo pyuo karape. Dopa pirinyi dokopa emba anja panda anja dupwana yulu pirinyi dupwana kapa palyuo para. <sup>4</sup> Nakamame banya pii warombo serami ramo doko Kamongome namba langyuo lalu lao lao langiya doko yaki nyuo kame soo kaeya nara. Dopa lao lalu lao langyuo, Nambana para pyasi dupwame nakamana suu pingi monape peparaeme banya mawa pii dupwa kandokondali pyuo warombo soo kararami ramo doko Isaraele dupwa rapu pyuo iso kararami, leya.

<sup>5</sup> Pii mende palamoko. Akali Joapeme Isaraele wambunya yanda singi mupwa lama Apena Nuana ikinyingi dokopa Amasa Jetana ikinyingi dokopa namba keta pyao peyo piya kande doko suu pyape. Akali dokome namwa manda rao kareyamano dokopa yanda dokona akali lapo pyao kumakayami kande doko yano nyuo piya.

Akali dolapome koo mende pii nayambinyipa mee piyamosa banya yulu doko namba keta ipyamosa randa nyilyu. <sup>6</sup> Dokona emba mende piri doko silini. Doko embame baa mee wambu kumungi dopa pyuo kumunya lao yaki nyii napipi.

<sup>7</sup> Namba embena yangone Epesalomeme pyalana piyamo pakao ralo peyono dokopa nakamame namba anjiki pyuo nyisiyamiñi. Dokona yuu Giliate range akali Basilainya ikinyingi dupwa embame kando anjiki pyuo nyiso karape. <sup>8</sup> Dokona akali mende opetae Simai lenge akali Gerana ikinyingi akali Benjamenena yuu dokona yuu taone Barumi lenge singi dokona range dokome namba yuu Makanaima dokona pena peyono yuu gii dokopa baame namba koo keta paliri, leya. Dopa piyamopape ipwa Jotane mare dokona baame namba kando nyiyamo dokopa nambame baa kando Kamongo dokona kingi lao lalu lao lao nambame baa nyuo pyao kumaka naro, leyo. <sup>9</sup> Dopa leyonopape embame baa randa mai napala mee karena kaeya napipi. Emba apa piru lao doko silini dokona angi kandapala baa pyao kumakape, leya.

### *Dapiti Kumuya*

<sup>10</sup> Dapiti baa kumuyamo dokopa banya yuu taone dokona malu piyami. <sup>11</sup> Baa ee kana akalisa kisima Isaraele wambunya kiñi ingyuo kareya. Karapala ee kana yanda ipingi nyepo yuu Eperone dokona kiñi yulu pyuo kareya dee yuu Jerusaleme dokona ee kana akalisa rema dee ipisu remako nembo kiñi yulu pyuo karo piya.

<sup>12</sup> Dokopa enakana Solomoneme banya rakange Dapitinya panda nyuo baa kinji kareya. Karapala banya kinji yulu piyamo doko kandokondali pyuo minyaro karo piyamosa yulu doko ando peya.

*2:13-46 Kinji Solomonena yangonge Atonisa lenge dokome Solomonena panda nyuo kinji karapuli yaka lao suu pyao kareyamosa kinji Solomone baame Atonisa pyao kumakaya. Dee Dapitimi pinya leyamuli pyuo Solomoneme Joapepa Simaipa pyao kumakayako.*

### 3

*Solomoneme Mona Palenge Singinya Renge Jinya Lao Atena Leya*

<sup>1</sup> Yuu Isipi kinji dokona wanenge doko nyepala Solomoneme kinji dokopa kando puu minyuo kararamba lao lalu lao leya. Baame enda doko nyepala minyuo pao Dapitinya yuu taone dokona reto palyuo karo banya andape tembole andape dee yuu Jerusaleme kana kame awali lao dupwape pyuo oteya. <sup>2</sup> Tembole anda doko Kamongona lao pyakamipa nayaminyi dokona wambu dupwame kana pyare lasi wakale wakale dupwana mena pyao kiso maiyuo kareyami. <sup>3</sup> Dokopa Solomoneme Kamongo mona retapala banya rakange Dapitimi mana leyamo dupwana moko minyuo piya. Dopa piyamopape baame mena dupwa opetae pyao kumakarapu kana pyare lasi wakale wakale dupwana kiso maipapu piya.

<sup>4</sup> Yuu mendepa baa yuu Gipione lenge dokona mena pyao kiso maiyala peya. Peyamo renge

doko kana pyare lasi dokona singi doko ama wambumi soo otenge dokome peya. Baame wamba dokona kiso mukinyi nembo maingi doko andete lapo malu dopale kiso maingi. <sup>5</sup> Yuu gii kukwa dokopa baa paleyamo dokona kombeyame Kamongo pano epapala baa piso soo lao, Nambame emba aki mende jii lao suu pilisi? leya.

<sup>6</sup> Dokopa Solomoneme isingi lao, Embame embena kendemande akali nambana rakange Dapiti doko kando embame yuu peparae mona retenge renge andake doko lasaka pii. Dopa piinyipa baame embena lenge kambu dorena kinyi rolae pyuo kareya. Dopa pyuo kareyasa embame baa mona retalu retenge renge andake doko lasaka pyuo puu pelyojo lao dokopa banya wane epapu banya panda nyuo iso karamo doko mai. <sup>7</sup> O Kamongo Anatu, namba wane kuki dee wambu dupwa kapa isaro ingya napyamopape embame namba kinji ingyuo rakanena panda nyii, lene. <sup>8</sup> Dokona wambu embena rangena ingyarami lao rombo palyiinyi dupwa pipya namba dae role pyao karamano. Wambu ama kamame malu soo kaeyo mendemepe yaka lao sukusa kapa paa narami. <sup>9</sup> Dokona lao keyange koopena wakale wakale doko anjuku lao soo nyuo dee kata rolae dokona soo rolo piru ingyiyamo dokona embena mona palenge singinya renge doko namba jepe. Jii nare ramo doko embena wambu malu dapwa nambame apa pyuo reto karo rapu pyakarose? leya.

<sup>10</sup> Solomoneme dokona lao piso siyamo dokopa Kamongo doko rae maiya. <sup>11</sup> Rae maipala Ka-

mongome baa lamaiyuo lao, Emba rangena yuu gii londe palyuo kararene dokonape kamongo ingyuo bange malu retarene dokonape panda embena nyisu petenge dupwa pyao anamasi minyuo kararene dokonape piso sepengeli doko kaepala embame wambu dupwa rolae rapu pyuo kararongo lao singinya renge jii lao piso silini. <sup>12</sup> Dokona embame piso silini dupwa nambame piru. Pipala nambame emba singinya renge konda pyuo joo dee soo nyinginya renge joo piru doko wambu mendemepe wamba nyii nalu nange dee mendemepe rengya nyii nalu naramiko doko jero. <sup>13</sup> Embame piso see napinyi lapo opetaeko nambame emba jero. Emba palu kararene yuu gii dusipana peparae kinji menge dupwa nyuo isa palyuo bange malu seramopa emba ketae pyambu kararami. <sup>14</sup> Embena rakane Dapiti piyamo doko suu pyao embame namba rape rape lao nambana mawa piipi lowa piipi dupwa warombo soo minyuo pyuo karare ramo doko yuu malu palyuo karare lao yuu gii londe jero, leya.

<sup>15</sup> Enakana Solomone sipurapala kandeyamo dokopa Kamongo dokome kombeyame pii lamaiya ingiyamosa baa soo gisiya. Dopa pipala baa yuu Jerusaleme papala Kamongona Kana Minyuo Lalu Lao Lenge Pii Palenge Bokote siyamo dokona lenge kambusa roya karapala bange kiso mukinyi nembo dupwape dee nyuo malu palyuo yalya kando piso bange maingi dupwape Kamongo maiyuo piya. Enakana dokopa banya akali mupwa peparae malu palyuo nenge kiso maiya.

*Solomone Kote Pii Andake Mende Randa Nao Soo Roleya*

<sup>16</sup> Yuu gii mende pamuku enda lama kinji Solomone peteya dokona epo kareyambi.

<sup>17</sup> Dokona mendeme lao, Emba kinji andake doko, enda dakepa nambapa anda mendakinya palenge. Enda baa peteyamopa namba anda dokona wane nyaŋa mandeyo.

<sup>18</sup> Nambana wane doko mandeyono yuu gii lama epo peyamopa baa waneko nyaŋa mandeya. Nambwa lama dolapo iki anda dokona peteyamba dokopa mendalipi epa nayami. <sup>19</sup> Yuu mendepa kukwa baame parali paki kapu kyama pao banya nyaŋa dokona ketae kalyiyamosa porambaiye nyii napala kumuya.

<sup>20</sup> Dokopa enda baa kukwa sipurapala namba luu paleyonopa wane nambana ikinyingi namba repeta paleyamo doko nyuo minyuo pao banya luu palenge panda dokona peya. Papala enda baame wane kumasi doko nambana panda reteyapya. <sup>21</sup> Yuu gii yangama dokopa namba lenge rapala wane anju mairu lao piyu dokopa wane kumasi dake siyamo kandeyo. Kandapala namba repeta suu lao kandeyo dokopa doko nambana wane dokona lenge kambu nyii naya, leyo, leya.

<sup>22</sup> Leyamo dokopa enda mende dokome lao, Daa wane lete doko nambana. Kumasi doko embena, leya.

Dokopa enda wambo dokome lao, Daa wane lete doko nambana. Kumasi doko embena, leya.

Dokona lao nakamba kinjinya lenge kambu dokona apyanda piyambi.

<sup>23</sup> Dokopa kinji Solomoneme lao, Nakamba mendeme lao wane nyanja lete doko nambama dee kumasi doko mendenanja lao letambinyi, leya.

<sup>24</sup> Lapala baame wua gela mende nyela pena leya. Leyamo dokopa nyuo minyuo epeyaminyi dokopa <sup>25</sup> baame lao, Wane lete doko kanya dokona lama pyuo kunjapala paki enda mende maiyuo paki enda mende maiyuo pinya, leya.

<sup>26</sup> Endangi angi dokome banya mona retenge renge doko banya wane keta peparaee peyasa baame kinji doko lamaiyuo lao, Emba kinji andake doko, wane doko pyaa napala enda doko mai, leya.

Dopa leyamopape enda mende dokome lao, Nambwa dalapona mendepe jii napipi. Suu pilini dokona palyuo lama ingyuo kunjape, leya.

<sup>27</sup> Dokopa Solomoneme lao, Wane doko pyao kumaka kae. Enda wambo doko wane dokona endangi angi doko lamonjo. Wane doko enda doko range mainya, leya.

<sup>28</sup> Isaraele wambu dupwame Solomonena yulu nyuo rolo piyamo doko sepala dopa pyuo kapa ingya nao apyanda pisi seramo dupwa Kamongome rolena lao singinya renge maiyalyamo lao soo nyiyami. Dopa pipala nakama peparaee baa ketae pyambuo kareyami.

*4:1-34 Wambu lapo Solomonena yulu pyakamingi isingi akali dupwana kingi pyasi palamo. Dee Solomone kinji kareyamo dokopa yuu doko kamonganyi palyiyamo dokona letamo. Dee Solomonena mona palyuo soo nyingi renge dokona letamo.*



## 5

### *Solomoneme Tembole Anda Pinya Rapa Rapa Piya*

<sup>1</sup> Kiñi Airimi lenge yuu Taya range doko Dapitipa yuu peparaee puu minyuo karengé. Doko Solomone baa kiñi ingyuo rakange Dapitinya panda nyiya leyami doko sepala baame pii minyakamingi akali lapo Solomone peteya dokona pena leya. <sup>2</sup> Dokona Solomoneme wai pii doko kapu kyo Airimi lamaiya. <sup>3</sup> Nambana rakane Dapitimi yuu muu baa nyisu petenge dupwa pipya yanda yaki nyii nao mee pyulu pyuo piyami. Dokona banya Kamongo dokome banya nyisu petenge dupwa pipya pyao wini pii lao wini pingi rengé ene maipa nayamo dokopa banya Kamongo Anatu lakandenge tembole anda doko pyakamiru lapala kapa pii naya doko emba silini. <sup>4</sup> Dopa piyamopape nambana Kamongo Anatu dokome nambana yuu lili dupwana manda rao mona kyo lao singi rengé jipya. Dokona nambana nyisu petenge mende kara nalyaminyi. Dee namwa pyao minyarapala nyeraminyi kata mende see nalyamoko. <sup>5</sup> Kamongo dokome nambana rakane Dapiti kando lalu lao lao, Embena ikinyi nambame embena mata kiñi wasaro dokome nambana tembole anda doko pyakara, leya. Dokona epapu nambame tembole anda doko nambana Kamongo Anatumya lakandenge anda doko pyakamiru lao suu pilyu, leya. <sup>6</sup> Emba soo otelene. Embena akali dupwa isa pokonge yulu doko soo otenge. Dopa pyuo nambana akali

dupwa isa pokalena saka nange. Dokona lao embena akali lapo yuu Lapanone dokona isa sita lapo nambana pokakanale pena lape. Larenepa nambana akali dupwa nakama pipya role yulu pirami. Piraminyipa embame bange aki mende larenyili pyuo embena akali dupwa ropo pyakaro.

<sup>7</sup> Airimi baa Solomonena wai pii doko nyepala ama rae wakasa maipala baame lao, Dapiti banya panda nyepala wambu rara andake dokona kinji karara lao Dapitinya ikinyingi keyange singi renge doko maiyamo dokona lao epapu Kamongona kingi lakandamana, leya. <sup>8</sup> Lapala Airimimi wai pii lapo dee kapu kyo Solomone lamaiyuo lao, Namba embena wai pii doko nyipu. Nyepala embame piso sipinyili pyuo piru lao rapa rapa pilyu. Nambame isa sitape dee siya isape dupwa rapa rapa pyakaro. <sup>9</sup> Nambana akali dupwame yuu Lapanone piso isa pote dupwa minyuo epo ipwa kota dokona peyarami. Dokopa yuu emba rombo palyiinyi dokona soo pao retena lao isa para para dopale ingyuo nyuo pyaso puu pyarami. Soo pao retarami dokopa nambana akali dupwame puu polarami dokopa embena akali dupwame nyepala iso kararami. Dokopa embena yulu doko nambana akali dupwa nenge maso mairinyipa nao karena lao namba suu pilyu, leya.

<sup>10</sup> Lapala Airimimi isa sitape dee siya isa potepe Solomoneme nyelana suu piyamo dupwa maiya. <sup>11</sup> Dokona Solomoneme nenge witi sikyali taosande lama ama malu dee isa olipi ipwange ama maluko soo kaeyo ee kana yaka lao banya akali dupwa maiyuo nenge pyakamiya.

<sup>12</sup> Kamongo dokome banya lalu lao leyamo doko kame see napapu karapala Solomone singinya renge doko maipapu piya. Akali Airimi Solomonepa keta mona kyuu lao singinya renge doko paleyamosa nakamba mona mendaki palyuo yulu dupwa dopa piramba dopa piramba lao lao palyiyambi.

<sup>13</sup> Kiji Solomoneme akali taosande akalisa rema Isaraele peparaena rombo palyuo nyepala yulu pinya leya. <sup>14</sup>Lapala akali Andonirame lenge doko baa mupwa ingyuo dokona rapu pinya leya. Baame akali dupwa lili rema pyuo lane mendaki akali taosande akalisa ingyapala lane mendaki mendaki lao larapu yuu Lapanone dokona kana mendaki yulu pyuo karo dee kana lama larapu anda karo pinya leya. <sup>15</sup> Dokopa Solomoneme akali taosande akalisa mange lama (80,000) karo nyepala yuu kyau dupwana kana dupwa pyao nyinya leya. Dee akali taosande akalisa yanda ipingi nyepome (70,000) kana dupwa soo pena leya. <sup>16</sup> Dee akali mupwa taosande rema dee andete remameko yulu dupwana mupwa ingyuo isinya leya. <sup>17</sup> Kiji Solomoneme leyamuli pyuo nakamame kana andake keyange tembole anda dokona susa sera dupwa nyiyami. <sup>18</sup> Solomonena yulu pingi akali dupwape Airiminya yulu pingi akali dupwape dee yuu taone Bipilose range akali dupwapeme tembole anda pirami dupwana isa kanape dupwa rapa rapa piyami.

## 6

### *Solomoneme Tembole Anda Doko Piya*

<sup>1</sup> Isaraele wambu dupwa yuu Isipi yaki nyuo epo kareyaminyipa ee kana malu (480) epo pa-peyamopa kini Solomone dokome Isaraele iso kareya. Iso kareyamopa ee kana kisima pa-peyamopa kana lapo kingi Sipi lenge dokona Solomoneme tembole anda pinya kando soo piya.

<sup>2</sup> Doko andakare dorena puu rombo minyuo makande pyuo isa makando akalisa lama ipisu yanda ipingi (27 mita) dopale ingiya. Dee wangu dolapona isa makando mange mendaki (9 mita) ingiya. Dee ketae dorena makande piyaminyi isa makando akalisa mendaki ipisu rema dee mende pakirena opetae (13.5 mita) dopale ingyuo piya.

<sup>3</sup> Dokopa panda konandowame doko makande pyuo isa makando kisima dee pakirena (4.5 mita) dopale ingiya. Dee wangu dolapona tembole anda angi dopale ingyuo isa makando mange mendaki karo (9 mita) dopale ingiya.

<sup>4</sup> Anda dokona apya windowa kamarename kuki ingyapala andakar-erena andake ingyuo sinya lao wasiyami.

<sup>5</sup> Panda poo pyasi wangu dolaponape dee matarenape panda lama konda pyuo reteyami. Anda dokona anda liti rema ingyuo kamba kamba kareya. Dokona panda kuki lapo opetae kunjo reteyami.

<sup>6</sup> Urumu mendaki lao wambo isa anda dokona apya doko kameya pyuo pyapala mende kanya dokona apya doko maena ingyuo pyao karo pipala kamame ketae doko kamame maena kuki ingyuo sukusa paowale kareyami. Anda liti dokona ketae pulyuo pyuo dokopa apya parali dolapo kukinya pyambuo kareyamisa andakare andake ingiya. Isa anda doko isa makando lama dee kuki mende konda pyuo dopale ingiya (2.2 mita). Kanya anda

doko isa makando lama dee pakirena dee kuki konda pyuo dopale ingiya (2.7 mita). Ketae anda doko isa makando rema dee kuki konda pyuo dopale ingiya (3.1 mita).

<sup>7</sup> Tembole anda doko pimiñi lao ama doope wua jaa laope dee mee bange kela kalope dupwame panasara lapala kana tembole anda dokona palyuo piraminyi dupwa kana apuro nyiyaminyi mare dokona piso rapa rapa pipala peyami.

<sup>8</sup> Anda liti lamape remape panya dokopa lora makayami doko yuu dulurena kanda kanda makayami. <sup>9</sup> Dopa pyuo kiñi Solomoneme tembole anda pyuo oteya. Baame isa siya polañe pisi dokome ketae lulyano ingyuo lambuo laeyo pyuo waso dee dokomeko anda yangi ingyuo kaowa piya. <sup>10</sup> Anda liti rema dokona pinjingi dusipa isa makando dee kuki konda pyuo dopale kapa kapa pyuo ketae pyambuo piyami. Panda poo pyasi kamarena dokona siya isa dokome pyuo nyokonyapala dokopa wakale panda netarena konda pyuo reteyami. <sup>11</sup> Kamongo dokome Solomone lamaiyuo dopa leya, <sup>12</sup> Emba nambana lowa peparaepe dee mawa pii peparaepe warombo soo minyare ramo doko embena rakane Dapiti keta lalu lao leyono doko emba keta pyakaro. <sup>13</sup> Embame tembole anda pilini dakena namba nambana Isaraele wambu dapwa pipya sukusa dokona role pyao karo nambame nakama kame soo yaki nyii naro, leya.

<sup>14</sup> Dokona lao Solomoneme tembole anda doko pyuo oteya.

*Tembole Andakare Dokona Kalya Piyami*

<sup>15</sup> Anda apya andakare dorena isa panda dokona piso pulyuo isa kingi sita lenge dokome kalya pyuo ketae peyami. Dee isa panda doko siya isa dokome wasiyami. <sup>16</sup> Dee andakare sukusa dokona urumu mende kingi Kamame Poo Pyasi lenge doko tembole anda matarena ingyuo piyami. Doko makande pyuo isa makando mange mendaki karo (9 mita) londe dopale ingiya doko isa sita make dokona lili pipala isa panda dokona piso pao ketae yangi dokona suu lao piyami. <sup>17</sup> Dee urumu Kamame Poo Pyasi lenge dokona panda mende kambusa siyamo doko makande pyuo isa makando akalisa ipisu mange lama karo (18 mita) londe ingyuo waso reteya. <sup>18</sup> Dee isa sitame wasisi polañe dupwa isa jingipi kipwa pengepe isame wasisi bange dupwame kalya piyami. Pipala andakare peparae dupwa isa sitame wasisi polañe dupwame kaname kame pyuo apya wasiyami dupwa kanda nana lao yambe pyao oteyami.

<sup>19</sup> Kamongona Kana Minyuo Lalu Lao Lenge Pii Palenge Bokote doko retarami ingiya dokome tembole anda matarename dokona panda sukusa doko wasiyami. <sup>20</sup> Doo panda sukusa andakarelyamo doko makande pyuo isa makando mange mendaki karo (9 mita) londe dee isa makando mange mendaki karo (9 mita) ketae ingyuo dee isa makando mange mendaki karo (9 mita) oko soo dopale ingyuo piya. Dupwa peparae kana golo karo pisa nange dupwame nee piyami. Dee kana pyare lasi doko isa sita dupwana polañe dupwame yambe piyami. <sup>21</sup> Dopa pipala

tembole anda andakare apya dupwa kana golo dupwame yambe piyami. Dee kana golo kii puu dupwame panda sukusa kambu konandowame dokona yukuyami. Dokona apya opetaeko kana golo dupwame yambe piyami. <sup>22</sup> Dee tembole anda andakare apya dupwa peparae kana golo dupwame yambe piyami. Dee urumu Kamame Poo Pyasi dokona kana pyare lasi singi dupwa opetaeko kana golo dupwame yambe piyami.

<sup>23</sup> Anjala lama olipi isame wasisi dolapo urumu Kamame Poo Pyasi dokona reteyami. Dolapo laparae makande pyuo isa makando kisimako dee pakirena (4.5 mita) londe dopale ingyuo reteyami. <sup>24-26</sup> Laparae wangu dolapona mendare ingiya dee pinjingi dolapo mendareko ingiya. Dolapo laparae mendena mendena pyuo papake lamako karengi. Dolapo makande pyuo isa makando londe lama dee kuki mende (2.2 mita) dopale ingiya. Dokona lao papake pinjingi mendena dokome pao mende dokona doko kando nyiya. Doko makande pyuo isa makando pao kisima dee pakirena (4.4 mita) dopale ingiya.

<sup>27</sup> Nakambame dolapo laparae maki pyuo urumu Kamame Poo Pyasi dokona pisiyami. Nakambana papake dolapo laparaeme pyasinju laro karo mendena dokome mende kando nyuo mendena dokome mende kando nyuo pipala pao panda suku dokona kando nyinya lao pyuo dee paki lama dolapome pao apya doko kando nyinya lao pyuo piyami. <sup>28</sup> Anjala lama wasisi dolapo kana golo dupwame yambe pyao nyiyamo siyambi.

<sup>29</sup> Dokopa panda angi andake dokope panda ama sukusa andakare dokope peparae isame

wasisi bange yala isape isa jingipi aṅalape dupwame kalya pyuo waso pisiyami. <sup>30</sup> Dopa pipala isa panda dupwa kamame kana golo dupwame yambe piyami.

<sup>31</sup> Yambe pyapala olipi isame kambu dowā lama maki pyuo wasapala urumu Kamame Poo Pyasinya kambu konando penge dokona palyiyami. Kambu dowā pinjingi peyamo ketae dulurename anda kuki mende piyami. <sup>32</sup> Pipala kambu dowā dolapo isame wasisi bange yala isape isa jingipi aṅalape dupwame kalya pyuo wasiyami. Dokona kambu dowā dolapope aṅala dupwape yala isa dupwape peparae kana golo dupwame ketae minyarambu nyuo yambe piyami. <sup>33</sup> Dopa pipala panda aṅgi andake kambu konando penge wangu dolaponape dee ketae lambuo palyingi dokonape olipi isame wasiyami. <sup>34</sup> Dee siya isame kambu lama wasiyami. <sup>35</sup> Dolapo isame wasisi bange yala isape isa jingipi dee aṅalape dupwame kalya pyuo waso pisiyami. Bange dupwame kana golome kapa kapa pyuo kalya pyuo yambe piyami.

<sup>36</sup> Kana kunjasi pote rema wara piyami dokona kanda kanda anda poo pyasi dokona andakarena ingyuo isa sita mendaki lao retarapu dee kana rema lao retarapu dokome pyuo nenge lyolo piyami.

<sup>37</sup> Ee kana kisima dokona Solomoneme kiṅi yulu pyuo kareyamo yuu gii dokopa kana lapo kingi Sipi lenge dokona tembole anda doko pinya kanda soo puu rombo minyuo isa susa reteya. <sup>38</sup> Dopa pipala ee kana akalisa ipisu mendaki karo dokona



Solomonemeko isiyamopa kana mange lama karo doko kana Bulu lenge dokona rapa rapa pyuo reteyamo dopale angi dokonako palyapala tembole anda doko pyuo oteya. Tembole anda angi doko Solomoneme ee kana yanda ipingi nembo pyuo oteya.

*7:1-51 Kinjinya anda keyange Solomoneme range piyamo dokonape dee bange malu tembole anda dokona siyamo dupwanape letamo.*

## 8

*Anatunya Kana Minyuo Lalu Lao Lenge Pii Palenge Bokote Doko Soo Jerusaleme Peyami*

<sup>1</sup> Kamongona Kana Minyuo Lalu Lao Lenge Pii Palenge Bokote doko yuu Sayone kinji Dapitinya taone dokona silyamo doko nyuo soo tembole anda dokona monalenge lao Solomoneme Isaraelena rarape akalyandape dupwana akali mupwa ingyuo karengge dupwape peparae baa karo dokona epena lao kee leya. <sup>2</sup> Nakama peparae kana kingi Etanimi lenge dokona nakamame kauwa anda pipala palyuo nenge nenge gii doko pyaka siyamo dokopa malu palyiyami. <sup>3</sup> Dokopa lita akali dupwa peparae epo malu palyiyaminyi dokopa purisi dupwame Kana Minyuo Lalu Lao Lenge Pii Palenge Bokote doko minyalyapala soo pao <sup>4</sup> tembole anda dokona peyami. Dokopa purisi dupwamepe Lipae akali dupwamepe Kamongona komau anda dokope dee bange dokona singi dupwa peparaepe nyuo minyuo tembole anda dokona

peyami. <sup>5</sup> Kinji Solomonemoo Isaraele wambu peparaepe epo Kamongona Kana Minyuo Lalu Lao Lenge Pii Palenge Bokote siyamo dokona lenge kambusa karo mena sipisipi dee mena bulamakaope dupwa ama malu soo kaeyo kapa yaka lao ota narami ingyuo pyao kiso maiyami.

<sup>6</sup> Dokopa purisi dupwame Kana Minyuo Lalu Lao Lenge Pii Palenge Bokote doko tembole anda andakare urumu Kamame Poo Pyasi dokona anjala lama wasisi kareyambinyi dolapo isarena lunga lunga reteyami. <sup>7</sup> Dokopa nakambana papake dolapome bokote dokope bokote singi isa kalya isa dolapope yambe piya. <sup>8</sup> Dopa piyamo dokopa wambu mendeme urumu Kamame Poo Pyasi dokona lenge kambu siyamo dokona karapala isa kalya isa dokona pinjingi dolapo rolae kandarami ingiya. Dee mendasa karo kapa kanda narami ingiya. (Yuu gii pii dake Buku dakena pii dake pyao reteyaminyi yuu gii dokopa isa kalya isa dolapo yuu dokona mee siya.) <sup>9</sup> Isaraele wambu dupwa yuu Isipi piso epeyaminyi dokopa Kamongome nakama pipya kana minyuo lalu lao leyamopa Moseseme yuu kyau Sainai dokona karo pii dupwa kana lamana pyasi doko Kana Minyuo Lalu Lao Lenge Pii Palenge Bokote dokona palyiyamo dolapoko iki paleya.

<sup>10</sup> Purisi dupwa tembole anda doko yaki nyuo kama epeyaminyi dokopa aopa kopa dokome soo simbwapala <sup>11</sup> Kamongona yanga paupau lenge dokome nakamana lenge kambu dupwana lepo lepo piyasa nakamana yulu dupwana kamba kapu kyuo andakare pela parami ingya naya.

<sup>12</sup> Dokopa Solomoneme atenja lao,

Kamongo, Embame neta doko yake dokona rao  
 karena leenepape  
 emba kopape yuu iminjingipi dupwana mee  
 kararo lee kande.

<sup>13</sup> Dopa leenepape epapu nambame embena lao  
 tembole anda kamame keyange wakasa  
 doko pyakapu.

Panda dokona emba epo karalu karare.

*Solomone Baame Wambu Pii Lamaiya*

<sup>14</sup> Wambu dupwa dokona kareyaminyi dokopa  
 kinji Solomone kapu kyepala nakama kandaro  
 karapala Anatu baame nakama elyape keta  
 pisinya lao piso siya. <sup>15</sup> Baame lao, Isaraele  
 wambunya Kamongo Anatu doko lakandamana.  
 Nambana rakane Dapiti kando lalu lao leyamo  
 doko alowa pii nalyamo, leya. <sup>16</sup> Kamongome  
 lao, Nambana wambu dupwa yuu Isipi piso  
 lanyuo epeyono dokopa Isaraele wambunya yuu  
 dupwana nambame yuu taone mendena tembole  
 anda pipala namba dokona lakandaraminji  
 lao rombo palya nayo. Dopa pii nayonopape  
 nambame Dapiti emba nambana wambu dupwa  
 rapu pyakape lao rombo palyiyu, leya.

<sup>17</sup> Lapala Solomoneme deeko lao, Nambana  
 rakane Dapitimi Isaraele wambumi Kamongo  
 Anatu lakandarami lao tembole anda mende  
 pinya lao rapa rapa piya. <sup>18</sup> Piyamopape Kamongo  
 dokome baa lamaiyuo lao, Emba nambana lao  
 tembole anda pyakapulinya kumulini doko ka-  
 paṅa. <sup>19</sup> Dopa pipinyipape embame tembole anda  
 doko pii nalu nao nare, langilyu. Doko embena  
 wane emba rangena ikinyi angi dokome nambana  
 tembole anda doko pyakara, leya.

<sup>20</sup> Dokona epapu Kamongo dokome banya pii lalu lao leyamo doko retaro karamo. Namba Isaraele wambunya kini ingyuo nambana raka-nena panda nyuo nambame Isaraele wambu nakamana Kamongo Anatu lakando kararami lao tembole anda doko pyakamiyu. <sup>21</sup> Namwana rora ambasu dupwa baame yuu Isipi piso lanyuo epo Kamongome kana minyuo lalu lao pii leyamo kana dolapona palenge bokotena palyingi doko opetae tembole anda dokona retara lao nambame panda wasakamiyu, Solomoneme leya.

### *Solomone Ateja Leya*

<sup>22</sup> Dokopa wambunya lenge kambu dupwana Solomone papala kana pyare lasi dokona lenge kambusa kareya. Karapala banya kingi ketae pyambwapala ateja lao, <sup>23</sup> Isaraele wambunya Kamongo Anatu, mendasa yake panda ketaepe isa yuu dakenape Anatu emba yale mende kara nange. Embena wambu dupwame emba kando mona kare kare karo embame larene dupwa pyuo palyuo karo piraminyi dokopa embena kana minyuo lalu lao leene pii doko embena wambu dupwa keta reto karo nakama mona reto karene. <sup>24</sup> Nambana rakane Dapiti kando lalu lao leene doko embame minyaro karene. Epapu pii peparae pyaka silyamo. <sup>25</sup> Dokona epapu Isaraele wambunya Kamongo Anatu, nambame ateja lao, embame lalu lao lenge pii lapo nambana rakane kando lao doko opetaeko yaki nyii nao minyuo karape. Banya para pyaramo dupwame nambana rakangeme emba warombo soo kareyamuli pyuo piraminyi dokopa nakamana mendeme Isaraele

wambunya kinji ingyuo yuu peparaee rapu pyuo karara lao lalu lao leepya. <sup>26</sup> Dokona lao Isaraele wambunya Anatu, epapu embena kendemande akali nambana rakane Dapiti kando pii leene dupwa peparaee angingyuo pinya leya.

<sup>27</sup> Dopa piramopape Anatu, emba kinyi angingyuo isa yuu dakena palyuo karo pilisi? Yake peparaee emba kapa karare ingya nalyamo. Dokona apa pipala emba tembole anda piyunu dakena kapa kararese? <sup>28</sup> Kamongo nambana Anatu, namba embena kendemande akali. Nambana atenja pilyu doko sakape. Sakapala epapu nambame emba pii piso silyu dupwa pyakape. <sup>29</sup> Tembole anda dakena lakandaraminji lao embame rombo palyii dokona kukwa korakamape rapu pyuo karape. Nambame tembole anda dakena lenge kambu pyambwapala atenja laro dokopa sakape. <sup>30</sup> Yuu dakena nakamame lenge kambu pyambwapala atenja leyami kande dokopa embena wambu dupwana atenja dupwape nambana atenja dupwape sakape. Embena anda yake panda dokona karo sepala namwana koo dupwa nyuo kame sakape.

<sup>31</sup> Wambu mendeme wambu mendale yango kando koo pipyanja lapala baa pii naronjo lao lalu lao lara lao tembole anda dakena embena kana pyare lasi dokona lanyuo eparami. <sup>32</sup> Eparaminyi dokopa O Kamongo yake panda karo sepala embena kendemande dupwa iso rolo pinya karape. Mendeme kokwa soo koo piya kande doko baa randa maipi. Dee mendeme koo pali nalyamo lao suu pyao rolae pyuo kareya kande doko kiiramo nyepe.

<sup>33</sup> Embena Isaraele wambu dupwame emba keta koo piraminyi dokona nakamana nyisu petenge dupwame nyuo isa palyarami. Dokopa dee nakama emba keta kapu kyo epapala tembole anda dakena nakamana koo dupwa nyuo kame saka lao epo inyimungu piso seraminyipa <sup>34</sup> emba yake panda dokona karo nakamana pii sakamipi. Embena wambu dupwana koo dupwa nyuo kame sakamipala nakamana rora ambasupi yuu mainyi dokona minyuo pupi.

<sup>35</sup> Embena wambu dupwame emba kando koo piraminyisa embame apu epa nana lao minyarene dokopa dee nakamana koo dupwa kaepala polo lapala tembole anda dakena lenge kambu maro lao epo inyimungu piso atenja laraminyipa <sup>36</sup> emba yake panda dokona karo nakamana atenja doko sakamipi. Isaraele wambu dupwana koo dupwape dee kinji dokona koo dupwape nyuo kame sakamipi. Dopa pipala yulu rolae dokona pinya lao mana lamaipi. Mana lamaipala, O Kamongo embena wambu dupwa palu karo pirami lao embena yuu angi ingyuo maiyalu maiyuo mainyi dakena apu epo karena lape.

<sup>37</sup> Dopa pipala yuu dakena lopo andake seramo panda wambu peparae yanyi andake pyaramo panda poo raiya andake minyapala ee dupwa kumaramo panda aimbu malu ee naraminyi panda embena wambu dupwa nakamana nyisu petenge dupwame pyalana piraminyi panda yanyi angape nakama keta palira dokopape <sup>38</sup> nakamana atenja doko sakamipi. Embena Isaraele wambu dupwana mende mona randame kumuo tembole anda dakena lenge kambusa

nakamana kingi pyambwapala atēja larami dokopa <sup>39</sup> nakamana atēja doko sakamipi. Embena anda yake panda dokona karo nakamana atēja sakamipi. Sepala nakamana koo dupwa nyuo kame sakamyuo nakama nyisape. Embame iki isa akalinya mona suu pingipi dupwa soo gisilini. Wambu yulu wakale wakale pilyaminyili pyuo yano pyakamipi. <sup>40</sup> Dokona lao embena wambu dupwame embame namwana rora ambasupi yuu mainyi dokona palu karo yuu peparae emba warombo sinya.

<sup>41-42</sup> Wambu rara wakale yuu nanesa palenge mendeme embena kingi andake dokope embena yulu andake dokope embena wambu keta piinyi dupwape sepala emba lakandala epo tembole anda dakena atēja lala eparamo dokopa <sup>43</sup> banya atēja doko sakamipi. Yake panda emba palenge dokona karo banya atēja doko sakamipala emba pii lao piso seramo doko pepe. Dokona lao wambu yuu muu peparaena karengé dupwame embena Isaraele wambu dupwame emba soo nyuo warombo soo kararaminyili pyuo pirami. Dokopa nakamame tembole anda nambame piyunu dake emba lakandenge panda lao soo nyerami.

<sup>44</sup> Embena wambu dupwa nakamana nyisu petenge wambu dupwa pipya pimwaiyuo yanda pela pena lao lamairinyi dokopa nakamame emba kando atēja larami. Yuu wakale wakale dupwana karo yuu taone embame rombo palyiinyi dakepe dee tembole anda nambame embena lao pyakayono dakepe kandaro karo atēja leyami kande dokopa <sup>45</sup> nakamana atēja dupwa

sakamipi. Emba yake panda dokona karo nakamana atenja dupwa sakamipala nakamana nyisu petenge dupwa kapa anamasi minyarami lao poraiyuo nyisape.

<sup>46</sup> Wambu mendeme koo pii narande daa. Dokona embena wambu dupwame emba kando koo piraminyipa emba imbwuapala nakamana nyisu petenge dupwame nakama pipya pyao wini pinya lapala nakama yuu wakale dupwana karapusi ingyuo lanyuo pena lao pepe. Dopa pirinyipa yuu doko nanesa wakasa ingyaramopape <sup>47</sup> embena wambu dupwana atenja laraminyi doko sakamipi. Yuu dokona nakamana koo dupwana lao kondapala polo lao kopetame kareyami dupwana lao atenja leyami kande dokopa, O Kamongo nakamana atenja doko sakamipi. <sup>48</sup> Tembole anda nambame embena lao pyakayono dokope embame namwana rora ambasupi yuu mainyi dakepe dee yuu taone embame rombo palyiinyi dakepe dupwana kandaro piso yuu dokona angi kinyi nakamana koo dupwana polo lao atenja larami ramo dokopa <sup>49</sup> nakamana atenja doko sakamipi. Embena anda yake panda dokona karo sepala nakama sakame kumuo nyiso karape. <sup>50</sup> Nakamana koo dupwa peparaepe dee emba kando mata jilyaminyi dupwape nyuo kame sakamipi. Dopa pipala nakamana nyisu petenge dupwame nakama keta anjiki pyuo pinya lao pyakamipi. <sup>51</sup> Nakama embena range kipungi wambu. Yuu Isipi dokona randa andake nao kareyaminyi dokopa nakama nyuo minyuo epee kande.

<sup>52</sup> Kamongo Mupwa Andake Wakasa, embena



Isaraele wambu dupwape nakamana kinji dokope kando anjiki koo pyuo dee nakama embame dopako pyuo nyisalase lao piso soo kee larami dokopa nakamana ateqa doko sakamipi. <sup>53</sup> Embame wambu dupwa embena range ingyara lao wambu peparaena rombo palyii kande. Namwana rora ambasu dupwa Isipi yaki nyuo minyuo epeene dokopa embena kendemande akali Mosese keta nakama dopa lamai.

### *Ateqa Pyao Lumwa Piyamo Doko*

<sup>54</sup> Solomoneme baa kana pyare lasi lenge kambu siyamo dokona wapambu pii pyaro piso kingi ketae pyambuo Kamongo kando ateqa leya. Ateqa lao otapala baa roya kareya. <sup>55</sup> Wambu nyuo malu palyuo peteyami dupwa keta Kamongona elyape keta pisingi renge doko peena lao baame pii poraiyuo lao piso siya. Baame lao, <sup>56</sup> Kamongo banya wambu dupwa manda rao mona kyyu lao singi renge mairuŋu lao lalu lao leyamuli pyuo mailyamo doko lakandamana. Banya kendemande akali Mosese keta yulu keyange pyakaro lao lalu lao leyamo dupwa peparaena mende isa nempa nao baa range suu pyaro karamo. <sup>57</sup> Namwana Kamongo Anatu doko namwa role kareya. Namwana rora ambasu dupwa pipya role kareya doko suu pyao baame namwa yaki nyii nana dee baame namwa kame soo kaeya nanako. <sup>58</sup> Baame namwana rora ambasupi dupwa keta mawa piipi lowa piipi maiyami dupwa minyuo dee namwa yuu peparae baame laramuli pyuo pyuo kararama lao baame namwa warombo soo pyuo karalamisi lao pinya.

<sup>59</sup> Namwana Kamongo Anatu atenja dake dee yulu lapo pyakapyali lao piso singi dupwape yuu gii peparaee kame see nao suu pyao karena. Namwana yuu peparaee bange nyeramili pyuo baame yuu peparaee Isaraele wambu dupwape dee nakamana kinji dokope keta sakame kumuo nyiso pyuo nyuo karena. <sup>60</sup> Dokona lao wambu rara yuu muu dupwana peparaeme Kamongo baa iki doko Anatu. Dee dokona mendali daa lao soo nyinyale. <sup>61</sup> Nakama banya wambu dupwa yuu peparaee Kamongo namwana Anatu doko kando baa yaki nyii nao suu pyaro karo banya mawa piipi lowa piipi dupwa peparaee epapu warombo soo karaminyili pyuo karena.

*Tembole Anda Doko Anatu Keta Pyambuo Misi Leyami*

<sup>62</sup> Dokopa kinji Solomonemoo wambu peparaee dokona kareyami dupwamepe Kamongo mena pyao kiso maiyami. <sup>63</sup> Baame yalya kando piso bange maingi dokona ingyuo mena bu-lamakao taosande akalisa lama ipisu lamako (22,000) dee mena sipisipi ama malu (120,000) pyao kiso maiyuo piya. Pipala kinji dokope wambu peparaepeme dopa pyuo tembole anda doko Anatu keta pyambuo misi leyami. <sup>64</sup> Pipala yuu gii mendaki dokopako baame tembole anda dokona lenge kambusa kamapi siyamo dokona sukusa doko poo pyasiñi lao Anatu keta pyambuya. Dopa pipala dokona baame mena pyao peparaee kisinyi nembo witi jingi maiyuo dee yalya kando nyuo malu palyuo piso bange maingi dokopa mena kapa dupwa maiyuo piya. Baame

doo piyamo doko kone kaname kana pyare lasi doko ama kuki ingyapala bange maiyamo dupwa peparaee kapa ingya nayasa piya.

<sup>65</sup> Doo tembole anda dokona Solomonemoo Isaraele wambu peparaee kauwa anda pipala nenge nyuo malu palyuo nenge dokona yuu gii yanda ipingi nembo misi lao peteyami. Dokopa wambu ama malu yuu Amate Kata Penge dokona suu lao epo dee yuu Isipi liti dokona minyuo epo piyami. <sup>66</sup> Dopa piyaminyipa yuu mange lama karo dokopa Solomoneme wambu dupwa anda pena leya. Kamongo dokome banya kendemande Dapiti baa elyape keta pisingi renge maiyuo dee banya Isaraele wambu dupwa keta maiyuo piya dokona nakama peparaeme baa lakandapala rae maiyuo anda peyami.

## 9

### *Anatu Solomone Keta Dee Paneya*

<sup>1</sup> Kinji Solomoneme tembole andape dee banya andape dee bange peparaee baa pinya suu piyamo dupwa peparaee pyuo oteyamo <sup>2</sup> dokopa baa yuu Gipione dokona kareyamopa epeya doko suu pyao Kamongo doko baa keta epo maro leya. <sup>3</sup> Dopa pipala Kamongo dokome baa lamaiyuo lao, Nambame embena atēja doko sipu. Namba yuu peparaee lakando karalu kararami panda ingyuo embame waso pipinyi tembole anda dake nambame poo pyasi ingyini pyambulyu. Dopa pyuo nambame au pyuo rapu pyuo kyawa minyuo karalu kararo. <sup>4</sup> Embena rakane Dapiti piyamo doko suu pyao nambana yulu dokona wangu lakapala angi kinyi yulu rolae dokona pyuo pulyuo

pao dee nambana lowa pii dupwa warombo soo rape rape lao nambana mawa pii emba mana langiyu dupwa peparae minyuo pyuo piri ramo doko<sup>5</sup> nambame embena rakane Dapiti lamaiyuo, Embena para pyasi wambu dupwame Isaraele wambu dupwa iso rapu pyuo parami lao lalu lao leyono pii doko nambame minyaro kararo. <sup>6</sup>Dopa pirunupape embape embena para pyarene dupwamepe namba moko minyuo epa napala nambana lowape mawa piipi dupwame nambame emba jiyunu warombo soo minyuo pyuo kara napala mee bange kingimi wasisi anatu wakale dupwa lakando parami ramo dokopa<sup>7</sup> nambame nambana Isaraele wambu dupwa yuu nakama maiyunu dokona pali nana lao nyisa pena laro. Tembole anda nambame poo pyasi ingyuo waso rae maiyuo nambana lakandenge pandaŋa lao karengge dake nyuo kame soo yaki nyuo kaeyaro. Wambu yuu muu dupwana peparaeme Isaraele wambu dupwa kando giyalya giyana pyuo kilya kando larami. <sup>8</sup>Tembole anda dake lalyuo momo nao seramopa wambu dokona epo parami dupwame kando walu lao mona nembarami. Dopa pipala nakamame piso soo lao, Akipamo Kamongo dokome yuu dakepe dee tembole anda dakepe keta yulu doko pipyase? larami. <sup>9</sup>Dokopa wambu dupwame isingi lao, Nakamana Kamongo Anatu dokome nakamana rora ambasu dupwa yuu Isipi yaki nyuo minyuo epeyamo doko kame soo mata maiyaminyisa pipya, larami. Nakamana mona suu pingipi mee bange kingimi wasisi anatu dupwa keta suu pyao papala lankandelyaminyi. Dopa piyaminyi dokona randa doko

Anatumi nakama keta maillyamo.

*9:10-28 Yuu Taiyana kinji kingi Airimi lenge dokome Solomone nyisiya. Solomoneme wambu lapo karapusi ingyuo nyuo yulu pinya lao anda wakale wakale piya.*

## 10

*Yuu Sipa Range Kuini Enda Dokome Solomone Kandala Peya*

<sup>1</sup> Yuu Sipa range kuini enda dokome Solomonena kingi petamo leyami doko siya. Sepala enda baame yuu Jerusaleme epo Solomone piso singi pii porai lapo piso soo makande pyuo kandalana leya. <sup>2</sup> Lao dokopa enda baame wambu lapo role pyao nyiso papingi dupwa lanyuo nenge rende pinya lao pyambungi bange lapope kalya bangepe dee kana golo ama malupi dupwa mena kamele matana retapala lanyuo epeya. Epo Solomone kando nyepala enda baame piso singi pii peparae suu piyamuli pyuo piso siya. <sup>3</sup> Dokopa Solomoneme pisiyamo dupwa peparae isingi yano piya. Mendepe dokona ama andake ingiyamopa randa nao polo lara ingyua naya. <sup>4</sup> Yuu Sipa range kuini enda dokome Solomonena mona palenge singinya renge dokona lao baa siya. Dee kinjinya anda baame piyamo doko kandeyako. <sup>5</sup> Enda baame Solomonena nenge nenge rate dokona nenge mokwa sisi siyamo dupwape banya akali mupwa dupwana palenge yuupi banya anda dokona yulu pingi akali dupwana yulu lao rolo retakamingi dupwape dee dupwana komau kala mendare palenge nakama wapungi dupwape dee

nenge nao nyuo malu palyingi dokopa Solomone baa isaro karengende kendemande akali dupwape dee tembole anda dokona mena pyao kiso maingi dupwape kandeya. Kandapala baa nenge longanyi nembo yamaranguya. <sup>6</sup> Dopa pipala baame kinji Solomone kando lao, Nambana yuu range dokona piso embape embena mona palenge singinya renge dokopena lao sipu doko kinyi angi lamo, leya. <sup>7</sup> Sepala dokopa namba kinyi lao soo nyii nange doko namba rangeme epapala kandelyo, leya. Kandapunupape nambame wamba angingyuo peparae see nange doko namba langiyaminyi siyu. Dokona dupwa isa palyuo embena mona palenge singinya renge dokope kamongonge bange retenge dupwape ama andake ulipili lamo, leya. <sup>8</sup> Nakamana enda dupwa rae maiyuo pelyaminyi. Dee nakamana kendemande akali dupwa embena lenge kambu dokona mee karoko pao embena mona palenge singinya renge pii dokonako soo karaminyi dupwa rae maiyuo pelyaminyi. <sup>9</sup> Nakamana Kamongo Anatu doko lakandalapa. Baame embapa role pyao karo dokopa rae maiyuu lao lasaka pyuo emba Isaraele wambunya kinji wasiya. Banya mona retenge doko Isaraele wambunya lao sulu singi dokona baame emba lowa dupwanape dee rolaena renge dupwanape paka pyao soo kararene lao kinji rombo palyiya.

<sup>10</sup> Enda baame bange minyuo epeyamo dupwa kinji Solomone maiya. Maiyamo dupwa kana golo taosande kisima (4,000) daako mee mendele ulipili maiya dee kalya bangepe dee nenge rende pinya lao reto maingi ama wakasa maiyuo piya.

Dopa pipala nenge kyaa pyuo rende pinya lao pyambungi dupwa panju nyelamopape dolome ama malu maiya.

<sup>11</sup> Akali Airiminya sipu dupwa yuu Opia piso kana golo lapo manjo epeyami. Dee yuu dokona isa kingi junipa lenge malu dee kalya bange lapo opetaeko manjo epeyami. <sup>12</sup> Solomoneme isa dupwame tembole anda dokonape dee banya anda dokonape alala ingyuo palyuo piya. Pipala isa dupwana lapome musiki pingi wambunya lao kurulu rambyalupi dopale pyuo wasiya. Dopa pyuo isa junipa ama keyange wakasa. Yuu gii dokona piso pao epapu dakepa yuu Isaraele dokona isa junipa dopale mende kandelyaminde daa.

<sup>13</sup> Kiŋi Solomoneme yuu Sipa range kuini enda doko yuu dokona bange mainginyili pyuo maiyuo dee baame bange peparae jinya lao piso siyamuli pyuo maiyako. Dokopa enda baape banya wambu role pyao nyiso epeyami dupwape kapu kyuo nakama rangena yuu Sipa peyami.

### *Kiŋi Solomonena Kamongonge Bange Dupwa*

<sup>14</sup> Ee kana yaka lao kiŋi Solomone baa kana golo kilokerame taosande akalisa lama ipisu rema (23,000) larapu nyiya. <sup>15</sup> Dee bisinase akali dupwame takisi kana piyaminyi dupwape bisinase yulu pyuo poropiti kana epeya dokope yuu Arapia kiŋi akalipi yuu Isaraele dokona yuu liti dupwana gapomane akali dupwamepe Solomone baa mupwa ingyuo karapyamo nakama karamanoŋo lao kana piyami dupwana peparaepe Solomone nyiyako.

<sup>16</sup> Kinji Solomoneme konambe kameya andete lama (200) pipala dupwana kana golo kilokerame yanda ipingi larapu konambe dupwana reto simbuya. <sup>17</sup> Dopa pipala baame konambe kuki lapo andete rema (300) kambako pipala dupwana kana golo kilokerame lama ingyuo konambe dupwana reto simbuya. Baame doo piyamo konambe dupwa peparae yuu Lapanone Imwa Anda Andake dokona reteya. <sup>18</sup> Baame kinjinya petenge isa seya kameya mende opetaeko wasiya. Wasiyamo dokona pakirename mena elepanena nenge dupwame yambe piya. Dee pakirename peparae kana golo keyange dupwame yambe piya. <sup>19-20</sup> Petenge isa angi piyamo doko kimbu kalyuo palyuo penge dusipa pakinyamange ingyuo singi. Doo isa pulyuo soo penge dusipana pinjingi kipwa kipwa dokona mendaki mendaki lao lalyuo mena laene yale dupwa waso pisiya. Mena laene waso pisiyamo dupwa akalisa ipisu lama ingiya. Dee petenge isa matarena dorena mena bulamakao kali ayemba dopale waso pisiya dee kingi retenge dolapona ralipi mena laene lama waso pisiya. Dokona petenge isa dopale mendepe kinji laponna isingi yuu dupwana see nange.

<sup>21</sup> Solomonena ipwa nenge pee kapo dupwa peparae kana golome wasisi. Dee bange peparae yuu Lapanone Imwa Anda Andake dokona yulu pingi bange dupwa kana golo keyange dupwame wasisi siya. Dokona kana kulingimi wasingi mendepe see naya. Renge doko Solomone kareyamo yuu gii dokopa kana kulingi doko mee bangeŋe lao suu piyami. <sup>22</sup> Solomonena sipu andake dupwape Airimi yuu Taya kinji



dokona sipu dupwa pipya ipwa kota andake dokona peyami. Ee kana rema yaka lao banya sipu dupwa kapu kyo epo dokopa kana golope kulingipi mena elepanena nengepe mena mangi rara lamape dupwa peparae manjo epapapu piyami.

<sup>23</sup> Kinji Solomone baa kinji munge dupwa isa palyuo baa kamongo ingyuo mona angi palyuo soo kareya. <sup>24</sup> Dopa piyasa yuu pepararena wambu dupwame banya mona palenge singinya renga Anatumi maiyamo dokona selana epeyami.

<sup>25</sup> Wambu peparae epeyaminyi dupwame kana golope kulingipi komau londepe yanda pingi bangepe nenge rende pinya pyabungipi dee mena osepe dongepe minyuo epapapu piyami. Doko ee kana yaka lao dopako pyuo kareyami.

<sup>26</sup> Solomoneme mena oseme ipyuo papingi uliuli taosande mendaki andete kisima (1,400) waso dee mena ose yanda singi pisapa pingi dupwa taosande akalisa ipisu lama (12,000) waso reteya. Dupwana lapo yuu Jerusaleme dokona reto dee lapo yuu taone wakale wakale dupwana reto piya. <sup>27</sup> Solomone baame isiyamo yuu gii dokopa kana kulingi dupwa Jerusaleme dokona mee kana dopale ingyuo peya. Dee isa sita keyange dupwa malu ingyuo mee isa sikamoo lenge dopale ingyuo siya. <sup>28</sup> Kinji Solomone baame mena ose dupwa Silisia dokona nyiya. Banya lao bisinase pyakamingi akali dupwame mena ose dupwa kana leyamuli pyuo ropo pyao nyakamiyami. <sup>29</sup> Dee yuu Isipi dokona piso mena oseme ipyuo penge uliuli dupwa nyiyami. Nyepala nakamame Iti kinjipi dee Siria kinjipi dupwa mena osepe dee mena

oseme ipyuo penge uliulipi dupwa ropo pyao maiyami. Maiyuo mena oseme ipyuo penge uliuli lapo dupwa maiyuo nakama mendaki mendaki laona kana kulingi andete pakinyamange (600) dokona lao ropo pyao nyiyami dee mena ose dupwana mendaki mendaki lao kana kulingi andete mendaki ipisu akalisa kingi paki (150) larapu nyepala maiyuo piyami.

*11:1-25 Solomone baame yuu rara wakale range enda malu dupwa nyiyamosa baame Anatu yaki nyuo mata maiyuo peya. Renge dokona lao Anatumi Solomonena ikinyingi keta kinjinya yulu doko neta nyepala wakale mende mairunju lao Solomone lamaiya.*

## 11

*Anatumi Akali Jeropome Kando Pii Lalu Lao Leya*

<sup>26</sup> Akali mende kinji Solomone mata maiyamo doko banya akali mupwa dupwana mende kingi Jeropome lenge baa akali Napatena ikinyingi doko baa yuu Sereta lenge yuu Eporaima singi dokona range. Akali banya endangi doko enda waiya kingi Serua lenge. <sup>27</sup> Sinju pii dake wambumi sipuro gapomane pipya pulyuo yanda pyuo leyami pii doko.

Dokopa Solomone baa yuu Jerusaleme neta pyakaenge dorena ingyuo yuu rapu siyasa yuu kyaso pyambuo ketae nyuo yuu taone dokona kana kame doko elya piya. <sup>28</sup> Dokopa akali parange Jeropome doko baa yulu dupwana mora piso baa yulu poraiyuo piyamo doko Solomoneme

kandeya. Kandapala Solomoneme baa akali Manasa Eporaimepana rara dolapona yuu dokona wambu karapusi ingyuo yulu poraiyuo piyaminyi dupwa peparaena baa mupwa ingyuo iso karena, leya. <sup>29</sup> Yuu gii mendepa Jeropome baa Jerusaleme piso peyamo dokopa poropeta akali Ainja yuu Sailo range dokome yuu wambu pali nange mendena baa katasa kando nyiya. <sup>30</sup> Kando nyepala Ainja banya komau enengende wapuya doko roko nyepala minyuo pilyuo kuki kuki pyuo akalisa ipisu lama ingiya. <sup>31</sup> Dopa pipala Jeropome lamaiyuo lao, Kamongo Isaraele wambunya Anatu dokome emba langyuo, Solomonena kinji yulu doko nyisa nyepala nambame emba rara akalisa jeroŋo dokona komau kangusi kuki kuki dokona akalisako nyepe, lapyo, leya. <sup>32</sup> Isaraele yuu peparaena piso nambana kendemande Dapiti dokona kingi lao dee yuu taone Jerusaleme namba rangena ingyara lao rombo palyiyu dokona kingi lao Solomone baa rara mendaki iki iso karara. <sup>33</sup> Nambame doo pirunu rengo doko Solomone baame namba mata joo yuu wakale range anatu lakandeya. Baame mee bange enda anatu kingi Asetate lenge yuu Saitone range doko lakando dee mee bange anatu kingi Kemoso lenge yuu Moape range doko lakando dee mee bange anatu kingi Milokome lenge yuu Amone range doko lakando piya. Dopa pipala namba warombo see nao baa yulu kopetame pyuo dee banya rakange Dapitimi piyamo doko suu pyao nambana lowa pii mawa piipi dupwa minyuo pyuo kara nalyamo. <sup>34</sup> Dopa pipyamopape nambame kinji yulu peparae

Solomonena kingi rekya lao nyeronde daa. Baa mee lete kararamo yuu gii dusipana nambame baa porainya renge maiyuoko kararo. Doo pirunu doko nambana kendemande Dapiti nambame rombo palyiyunupa nambana mawa piipi lowa piipi dupwa warombo soo pyuo kareya dokona kingi lao piru. <sup>35</sup> Pipala namba Solomonena ikinyingi dokona kinji yulu doko nyisa nyepala emba rara akalisa jero. <sup>36</sup> Jeronopape yuu taone Jerusaleme wambu dupwame namba lakandenge namba range rombo palyiyunu dokona nambana kendemande Dapitinya para pyasi dupwana mendeme iso karalu karara lao nambame Solomonena ikinyingi doko rara mendaki reto karena laro. <sup>37</sup> Lapala lao Jeropome nambame emba Isaraele wambunya kinji wasaronopa emba yuu muu rapu pinya suu pyarenyili pyuo rapu piri. <sup>38</sup> Embame nambana pii warombo sulu soo soo nambana mana pii minyuo pyuo palyuo karo nambana kendemande akali Dapitimi namba lengenyili pyuo pyuo karapala namba rae mainyi pyambungi doko suu pyao embame piri ramo yuu peparae namba embapa role pyao kararo. <sup>39</sup> Solomonena koo piyamo dokona Dapitinya para pyasi dupwa randa mairu. Mairunupape yuu gii peparaena mairunde daa.

<sup>40</sup> Doko Solomoneme Jeropome pyalana piyamopape yuu Isipi kinji Sisake kareyamo dokona kyawa lete nyuo pao karala peya. Pao dokona kareyamopa Solomone baa kumuya.

*Solomone Kumuyamo Doko*

<sup>41</sup> Doko yulu lapo opetae Solomone piyamo dupwape banya yulu pyuo minyuo papiyamo dupwape dee banya mona palyuo singinya renge dupwapena peparae Solomonena Arome Pii Buku dokona pyasi palamo. <sup>42</sup> Baa yuu Jerusaleme dokona Isaraele wambu pepararena kinji ingyuo ee kana akalisa kisima (40) iso kareya. <sup>43</sup> Baa kumuyamopa Dapitinya yuu taone dokona malu piyami. Dokopa banya ikinyingi Oriapome doko panda nyuo kinji kareya.

## 12

### *Wambu Dulurena Palenge Dupwame Oriapome Kando Yanda Pyuo Leyami*

<sup>1</sup> Akali Oriapome baa yuu Sikeme dokona Isaraele wambu dulurena palenge dupwa nyuo malu palyapala baa kinji ingyuo karena lalana piyaminyi dokona peya. <sup>2</sup> Dokopa Nepatena ikinyingi Jeropome baa kinji Solomoneme pyalana piyamosa pako pao yuu Isipi kareyamo dokome doo pilyaminyi leyami doko siya. Sepala Jeropome baa Isipi yaki nyuo kapu kyo peya. <sup>3</sup> Wambu dulurena palenge rara dupwame malu palyuo karapala baa epena leyami. Lapala dokopa nakama peparae Oriapome kareyamo dokona papala lamaiyuo lao, <sup>4</sup> Embena rakane Solomoneme namwa randa joo kenda dupwa namwa keta reteya. Embame kenda dupwa kukyuo yaepo namwa awa awa pyuo karalapa lao lao piri ramo doko namwa emba rape rape lao embena yulu pyakarama, leyami.

<sup>5</sup> Dokopa baame isingi lao, Yuu gii rema paparamo dokopa kamba kapu kyuwo ipupwape. Dokopa nambana pii isingi langiru, leya. Leyamosa nakama baa yaki nyuo peyami.

<sup>6</sup> Dokopa Oriapome akali alemo wamba rakange Solomone kando dopa pyuo piri dapa pyuo piri lao nyiso lamaingi lapo kandala peya. Wambu dapwame namba pii piso simi dokona lao aki pii keyange mende nambame nakama isingi lamairi lao suu pilyamisi? leya.

<sup>7</sup> Dokopa nakamame isingi lao, Embame wambu dupwa mondo lao rapu pinya suu pyare ramo doko nakamana piso simi dokona nyiso kondali pyuo isingi pii keyange nakama mona pyara mende lamairinyi dokopa nakamame emba iki rape rape lao yulu pyakarami, leyami.

<sup>8</sup> Dopa piyamopape akali andapae dupwana pii soo nyii napala akali baa kyawa kapa ando kareyami dupwa banya dopa pyuo piri dapa pyuo piri lao nyiso karengi akali dupwa keta peya.

<sup>9</sup> Dokopa baame nakama piso soo lao, Nakamame namba apa pyuo dopa pii dapa pii lao suu pilyamisi? Wambu dupwame nakamana kenda dupwa yaepo nembaka lao namba pisami dokona namba wambu dupwa kando apa larose? leya.

<sup>10</sup> Leyamo dokopa nakamame isingi lamaiyuo lao, Dake embame lamaipingili. Nambana kingi kuki dakepa nambana rakanena ingi rombape dokopa manda daa lao lamaipi. <sup>11</sup> Lamaipala dee lao, Nambana rakane dokome nakama randa andake jiya. Dopa piyamopape nambame nakama kamame ulipili ingyuo randa jero. Baame nakama lisa marapu dokome piya kande.

Nambame nakama mena osena wiki pepona dokome pyaro lena, leyami.

<sup>12</sup> Yuu gii rema papeyamopa baame nakama lamaiyamuli pyuo Jeropomemoo Isaraele wambu dupwa pipya kinji Oriapome peteyamo dokona peyami. <sup>13</sup> Peyaminyi dokopa kinji dokome akali andapae dupwame dopa pinya dapa pinya leyami pii dupwa soo koo inginyi nembapala wambu dupwa kando pii poraiyuo pondoma pyuo leya.

<sup>14</sup> Akali enye dupwame dopa pinya dapa pinya lena leyaminyili pyuo baame lao, Nambana rakane dokome nakama randa andake jiya. Dopa piyamopape kamame ulipili ingyuo randa jero. Baame nakama lisa marapu dokome piya kande. Nambame nakama mena osena wiki pepona dokome pyaro, leya.

<sup>15</sup> Yuu Sailo range akali poropeta Ainja keta Jeropome Nepatena ikinyingi doko keta pii lamaiyamo doko Kamongome pyaka sipyalu yaka leya. Renge dokona kinji dokome wambu dupwa kando anjiki pyuo kara naya.

<sup>16</sup> Wambu dupwame kinji dokome nakamana pii soo nyii nara ingiya doko kandapala nakamame pii poraiyuo lao, Dapiti baape banya ree palu dupwape isa pena. Nakamame namwa angi mende nyisa nalyaminyi. Namwa Isaraele range dupwa anda mwua. Oriapome baa rangena wambu dupwa mee iso karena leyami.

Dopa pyuo Isaraele wambu dulurena palenge dupwame Oriapome mata maiyuo yaki nyuo kaeyami. <sup>17</sup> Oriapome baame wambu yuu Juta palenge dupwa iki iso kareya. <sup>18</sup> Dokopa kinji Oriapome yulu pingi karapusi ingyuo

kareyaminyi dupwana akali mupwa Andonirame lenge doko Isaraele wambu dupwa kareyaminyi dokona pena leya. Dokopa Isaraele akali dupwame baa kaname pyao kumakayami. Yuu gii dokopa Oriapome banya mena oseme uliuli ipyuo piso papingi dokona piso baa range kyawa lete nyuo yuu Jerusaleme dokona peya. <sup>19</sup>Yuu gii dokona piso Isaraele wambu dulurena palenge dupwame Dapitinya panda nyuo akali kinji karo peyaminyi dupwa pipya yanda pimwaiyami.

<sup>20</sup> Isaraele wambu dupwame Jeropome Isipi kapu kyo epeya leyaminyi doko sepala nakama wato lenge dokona epena lapala baa Isaraele wambu dupwana kinji ingyuo karena lao rombo palyiyami. Jutana rara dupwa yeelyo Dapitinya para pyasi wambu dupwa pipya mona maiyuo pyamalyapala kareyami.

### *Akali Semayame Poropeta Pii Leyamo Doko*

<sup>21</sup> Dokopa Jeropome baa Jerusaleme epo pyaka sepala baame Juta rara dokonape dee Benjamenena rara dokonape ami yanda singi akali keyange ama malu (180,000) ingyuo epena lao nyuo malu palyiya. Palyapala baa Isaraele wambu dulurena palenge dupwa baame kamba range au pyuo rapu pinya suu pyao yanda pela para ingiya. <sup>22-23</sup> Dopa piyamopape Anatumi poropeta akali Semaya pii wai dake akali Oriapomemoo dee Juta Benjamenepana rara wambu dupwa peparape lamainya lao lamaiya. <sup>24</sup> Nakamana yangone angi Isaraele wambu dupwa pyaa nalapape. Doo mende pipyamo



doko nambame pipuŋu. Nakama peparae anda pupwape lena leya. Leyamo dokopa nakamame Kamongona pii doko warombo sepala kapu kyo anda peyami.

*Jeropomeme Kamongo Mata  
Maiyuo Peya*

<sup>25</sup> Isaraele kiŋi Jeropomeme yuu taone kingi Sikeme lenge yuu kyau pyalya pyana pingi yuu Eporaime dokona singi doko nyepala baa poraiyuo kame pyuo minyuo yuu gii kuki lama palyuo kareya. Karapala yuu doko yaki nyuo dee yuu taone Penele lenge doko nyepala porai ingyuo sinya lao kame pyuo minyiya. <sup>26-27</sup> Dokopa kiŋi Jeropome baa rangena mona anda dopa lao suu piya. Nambana wambu dupwa Jerusaleme papala tembole anda doo karamo dokona mena pyao kiso mairami ramo dokopa yuu Juta range kiŋi Oriapome kando banya yulu pyakamina lao lalu lao lapala namba pyao kumakarami lao suu piya.

<sup>28</sup> Suu pyao otapala enakana baame kana golo dokome mee bange anatuŋu lao mena bulamakao kali lama pyuo wasapala banya wambu dupwa lamaiyuo lao, Nakama Jerusaleme Anatu lakandala kapa papelyaminyiŋi. Dokona Isaraele wambu dupwa nakama Isipi kareyaminyipa kiiramo minyuo epeyamo nakamana anatu dalapoŋo, leya. <sup>29</sup> Lapala baame mena kali golome wasisi dokona mende yuu Betele lenge dokona pisiya dee mende yuu Dane lenge dokona pisiya. <sup>30</sup> Dopa piyamopa wambu dupwa koo pipala dokopa yuu Betele Danepe dolapona mee bange

dolapo anatuŋu lao lakandala peyami. <sup>31</sup> Dokopa Jeropomeme lakandenge panda lapo opetae yuu kyau ketae dupwana pyuo waso retapala dokopa dee ree palu Lipaena rara dokona daa akali lapo purisi ingyuo rombo palyuo nyiia.

*Yuu Betele Lakandenge Panda Doko Koo Ingyuo Para Anatumi Leya*

<sup>32</sup> Dokopa yuu Juta dokona nenge nyuo malu palyuo nenge nenge doko suu pyao kana mange lama karo dokona yuu gii akalisa ipisu kingi paki dokopa nenge nyuo malu palyuo nao misi larami lao Jeropomeme rombo palyuo reteya. Retapala kana pyare lasi yuu Betele siyamo dokona mena bulamakao kali kana golome waso reteyamo dolapo keta mena pyao kiso maiya. Baame purisi akali yulu pirami dupwa lakandenge panda yuu Betele dokona wasiyamo dupwana karena leya. <sup>33</sup> Pipala kana mange lama karo dokona yuu gii akalisa ipisu kingi paki dokopa baa rangeme yuu gii waso leyamo dokona baa yuu Betele papala kana pyare lasi dokona mena pyao kiso maiya. Isaraele wambunya lao malu palyuo nenge nenge yuu gii waso reteyamuli pyuo piya.

*13:1–16:28 Kamongona poropeta akali dokome Isaraelena kini Jeropome lenge kingimi wasisi bange dupwa anatuŋu lao lakanda nana lao pii repe repe lamaiya. Dopa lamaiyamopape Jeropome baame yulu pinginyili pyuo karo alowa pii naya. Dokopa kini Oriapome Juta range doko kumuyamopa Apisame banya panda alowa pyuo nyiia. Nyuo pyuo karapala kumuyamopa Asame kini yulu piya. Kini Jeropome baa opetae kumuya.*

*Kumuyamopa akali wakale lapo panda nyuo kinji yulu pyuo Isaraele iso karapa piyami.*

## 16

### *Isaraele Wambunya Kinji Ayape*

<sup>29</sup> Yuu Juta range kinji Asa ee kana akalisa rema ipisu mange lama (38) yulu pyuo kareyamo yuu gii dokopa Omirinya ikinyingi Ayapeme Isaraele wambunya kinji ingyapala Isaraele wambu dupwa rapu pyuo iso ee kana akalisa lama ipisu lama (22) yuu Samaria dokona kareya. <sup>30</sup> Kinji akali wambo karenge dupwame koo piyaminyipape baame Kamongo kando yulu koo kamame wakasako pyuo kareya. <sup>31</sup> Kareyamo dokopa Kinji Jeropomeme koo piyamo doko suu pyao Ayape baame kamame ulipiliko pyuo papala yuu Saitone range Kinji Etepalona wanenge kingi Jesapele lenge doko nyiya. Nyepala mee bange kingimi wasisi Bealo lenge doko lakando kareya. <sup>32</sup> Baame tembole anda mende mee bange kingimi wasisi Bealo lenge dokona lao yuu Samaria dokona pyakamiya. Pyakamipala mena pyao kiso maingi kana pyare mende banya lao wasakamipala tembole anda dokona andakare reteya. <sup>33</sup> Retapala baame mee bange enda anatu Asera lenge dopale mende opetaeko pisiya. Isaraele kinji wambo kopetame pyuo kareyaminyipape baame koo pipala Kamongo Isaraele wambunya Anatu dokona imbu singi doko kamame wakasako ketae ingyuo nyakamiya. <sup>34</sup> Doo baa yulu pyuo kareyamo gii dokopa akali Iyelo lenge yuu Betele range dokome yuu Jereko doko kamba waso piya. Kamongo

dokome Josua Nanena ikinyingi keta lamaiyamuli pyuo Iyelo baame kana susa reteyamo dokopa banya ikinyingi mupwa Apirame doko kumuya. Dee kame kambu doko waso piyamo dokopa banya ikinyingi enakana Sekupu lenge doko kumuya.

## 17

### *Ilainjame Apu Epa Nara, Leya*

<sup>1</sup> Poropeta akali kingi Ilainja lenge yuu Tisipi yuu Giliate dokona singi range dokome kinji Ayape lamaiyuo lao, Kamongo Isaraele wambunya Anatu lete karalu karengi dokona namba yulu pyakamingi dokona kingi lao nambame emba pii dake langilyu. Ee kana dumbinya lamape remape mendena apupi pipyaepe epa nalu nao nara. Namba apu dee epara laroni dokopa eparako, leya.

<sup>2-3</sup> Dokopa Kamongo dokome Ilainja lamaiyuo, Emba yuu dake yaki nyepala neta pyakaenge dorena papala ipwa Jotane neta pyakaenge dorena ipwa kukinde kingi Seriti lenge epelyamo dokona repeta yalu pinya leya. <sup>4</sup> Lapala dee lao, Emba ipwa kuki dokona kamuo nao karare. Dee yaka orapene lenge dupwame emba nenge minyuo epo jinya lao lamaipu, leya.

<sup>5</sup> Leyamo dokopa Ilainja Kamongona pii warombo sepala ipwa kuki epenge Seriti lenge dokona repeta palyuo piso kareya. <sup>6</sup> Dokopa baa yaka dupwame yangama alemanji lao nenge minyuo epo maiyami dee ipwa kuki dokona ipwa epeyamo kamuo neya. <sup>7</sup> Dokopa enakana dusale

apu epa naya dokome ipwa kuki dokona ipwa epeya doko sokoya.

*Enda Waiya Yuu Serepate Range Dokome Ilainja Nyisiya*

<sup>8</sup> Dokopa Kamongo dokome Ilainja lamaiyuo lao, <sup>9</sup> Epapu yuu taone Serepate lenge yuu Saitone repeta singi dokona emba karala pupi. Dokopa enda waiyande doo palenge dokome emba nenge pinya lao lamaipu, leya. <sup>10</sup> Dokona lao Ilainja baa yuu Serepate peya. Pao yuu taone dokona kame kambu dokona peyamo dokopa enda waiya doko isa ponale yapo nyuo kareyamo kandeya. Kandapala baame enda doko kando lao, Ipwa kamuo jinya, leya. <sup>11</sup> Dopa leyasa enda doko ipwa nyela peyamo dokopa dee kamba kee lapala nenge borete lapo opetae minyuo epo jinyako leya.

<sup>12</sup> Dokopa enda dokome isingi lao, Embena Kamongo lete karalu karenge Anatu doko kando lalo lao lao, Namba borete mendepe reta napu. Namba retapu dusipa kingi kete pyao dopale palawa kuki lama pere dokona silyamo dee isa olipi ipwange lama pee dokona petamo. Namba dae isa ponale mungyuo nyela ipunju minyuo anda papala nenge kuki retapu dolapome nambana wane dokopa nambapa suu pyao nenge wasaro. Dolapo nao ote pyuo narambanopa dee enakana lopo dokome nambwa angi kumaramba lyamo, leya.

<sup>13</sup> Leyamo dokopa Ilainjame enda doko lamaiyuo lao, Mona randa napala mee pao embena seramo dupwana wambo nambana

borete kuki mende wasakapala minyakao ipu. Enakana seramo dupwa embapa ikinyipa ingyuo range wasarene, leya. <sup>14</sup> Dokona lao Kamongo Isaraele wambunya Anatu dokome dopa lapyo. Namba Kamongo dokome apu peyapa narono dokopa pere dokona palawa ota nara dee pee dokona isa olipi ipwange dupwa ota narako lapyo, leya.

<sup>15</sup> Dokopa enda waiya dokome Ilainja pinya leyamuli pyuo piya dokopa yuu gii malu dupwana nakama nenge kapa siyamo neyami. <sup>16</sup> Doko Kamongo dokome Ilainja keta lalu lao lao lamaiyamuli pyuo pere dokona palawa ota naya dee pee dokona isa olipi ipwange ota nayako.

<sup>17</sup> Dokopa enakana mendepa enda waiya dokona ikinyingi doko anga piya doko ama pyao konda nyepala kopetame piyamopa baa kumuo oteya. <sup>18</sup> Dokopa enda dokome Ilainja kando lao, Anatumya akali doko. Embame namba keta akipamo yulu dake pilisi? Anatumi nambana koo dupwana kamba suu pyapala dokona dee nambana wane kumungi dokona pyambwakana lao ipisi? leya.

<sup>19</sup> Dokopa Ilainjame enda doko lamaiyuo lao, Wane doko namba jinya, leya. Lapala wane doko endangimi kupyaro kareya doko nyepala soo anda ketae baa paleya dokona papala ratena ketae reteya. <sup>20</sup> Retapala baame atena poraiyuo pyao lao, O Kamongo nambana Anatu, enda waiya dake kando yulu koo dopale doko akipamo pilisi? Enda baame namba kapa ingyuo rapu pipapyamopa dee epapu embame banya ikinyingi doko pyakamilyane, leya. <sup>21</sup> Enakana Ilainja

baa yuu remasa wane yongo dokona ketae pangu sepala atenja lao, O nambana Kamongo Anatu, wane dake kamba lete pyuo nyepe, leya. <sup>22</sup> Dokopa Kamongome Ilainjana atenja dokona isingi yano pyakamiya. Doko wane baa yongo peparae lenge rapala nee naepe siya.

<sup>23</sup> Dopa piyamo dokopa Ilainjame wane doko minyuo anda isarena endangi peteyamo dokona minyuo papala enda baa kando lao, Kanda, embena wane ikinyi doko lenge ralamo, leya.

<sup>24</sup> Dokopa enda dokome isingi lao, Epapu namba silyu doko, emba Anatunya akali angi Kamongo dokome emba angi kinyi pii langipyalamo lao epapu namba silyu, leya.

## 18

### *Ilainjamoo Dee Mee Bange Anatu Kingi Bealo Lenge Dupwana Poropeta Akali Dupwa Pipya Kareyami*

<sup>1</sup> Yuu gii lapo epo papeyamopa ee kana rema apu epa nayamo gii dusipa ro, leya. <sup>2</sup> Dopa leyasa Ilainja kata nyuo peya.

Dokopa yuu Samaria lopo siyamo doko soo andakiya. <sup>3</sup> Dokopa kinji Ayapeme akali mende kinjinya anda dokona mupwa ingyuo karenge Opetaya lenge doko kee lao nyiya. (Opetaya baa suu pingi keyange suu pyao atenja lao Anatu lakando karenge. <sup>4</sup> Dokopa enda Jesapele dokome Anatunya poropeta akali dupwa pyao kumakayamopa akali Opetaya dokome akali andete (100) nyiya. Nyepala kananda lapona gurupu lama wasapala pingyu akalisa kingi

paki (50) ingyapala palena lapala ipwa nengepe maipapu piya.) <sup>5</sup> Dopa piyamo dokopa kinji Ayapeme Opetaya lamaiyuo, Mena dongepe osepe dupwana rambi lapo kapa nao kararami lao ipwa guu lao epengepe ipwa ponape peparae dupwana mende silyape lao koto kando bwua, leya. Lapala lao, Mende ramo nambwana mena dupwana lapo pyao naa naramba, leya. <sup>6</sup> Nakamba mendali mendalipi yuu anjarename paramba lao lao mendakinya palyapala kata nyuo wakale wakale peyambi.

<sup>7</sup> Dokopa Opetaya enye katasa peyamopa aopa Ilainja epeyamo kando nyiya. Nyepala baame Ilainjana lao lenge kambu kandapala baa epeyamo dokona pangu isa siya. Sepala baame piso soo lao, Doko ang embese? leya.

<sup>8</sup> Dokopa baame isingi lao, Waa, namba Ilainjana. Namba dae epanyenje lao embena kamongo doko lamaila puu, leya.

<sup>9</sup> Dokopa Opetayame isingi lao, Nambame aki yulu koo pipusa embame randa dokona pyambwalana suu pyao kinji Ayapeme pyao kumakana lao letese? leya. <sup>10</sup> Embena Anatu lete kareng Kamongo dokona kingi lalu lao lao yuu muu dupwa peparana awali lao kinji dokome emba koto papipya. Yuu gii mendepape isingi akali dokome emba yuu dokona kara naenje lao lamaiyamopa Ayapeme baa doko anginji lao lalu lao lena leto, leya. <sup>11</sup> Dokopa dee epapu embame namba emba dae epo karene lao baa lamaila pupili lao suu pilisi? leya. <sup>12</sup> Nambame emba yaki nyuo parono yuu gii dokopa Kamongona Imambu dokome yuu kanda nange mendena emba nyuo lanyuo para



ramo doko apa pirase? Dokopa emba dae kareng  
lao Ayape lamairu dokopa baa epo emba ko-  
taramopa kara narene kandapala namba pyao  
kumakara. Namba wamba wane dokopa piso  
suu pingi keyange palyuo yuu peparae Kamongo  
lakando atenja lao kareng kandale doko emba  
suu pyaa, leya. <sup>13</sup> Lapala dee lao, Enda Jesapele  
dokome Kamongona poropeta akali dupwa pyao  
kumakaya dokopa nambame akali andete men-  
daki (100) nyepala kananda lapona gurupu lama  
wasapala pingyu akalisa kingi paki (50) ingyapala  
yalu pyuo palena lapala nenge ipwape maipapu  
piyu doko emba see naese? leya. <sup>14</sup> Dokona baame  
namba pyao kumakasaraja embame namba apa  
pyuo emba dae epo karene lao lamaila puu lao  
letese? leya.

<sup>15</sup> Dokopa Ilainjame isingi lao, Kamongo Porai  
Wakasa namba yulu pyakamingi dokona kingi  
lao lalu lao leto. Namba range kinji baa petamo  
dokona paro, leya.

<sup>16</sup> Leyamosa Opetayame kinji Ayape peteyamo  
dokona papala lamaiyamopa kinji Ayapeme kata  
nyuo Ilainja kandala epeya. <sup>17</sup> Dokopa Ayapeme  
Ilainja kandapala dopa leya, Isaraele dokona  
randa andake palyuo karene doko emba epelene  
dokose, leya.

<sup>18</sup> Dokopa Ilainjame isingi lao, Nambame randa  
epena lao pii nange, leya. Embapa embena  
rakanepa yuu Isaraele dokona randa palyuo  
karambinyi. Emba mee bange anatu lao kingimi  
wasingi Bealo doko lakandapala Kamongona  
mawa pii dupwana kamba lao karene, leya.

<sup>19</sup> Lapala, Yuu kyau Kamele dokona Isaraele

wambu dupwa peparaee kee lao sukusa sukusa pipala namba kandala epena lape. Epo dokopa mee bange anatu kingimi wasisi kingi Bealo lenge dokona poropeta akali andete kisima dee akalisa kingi paki (450) dusipape dee mee bange enda anatu Asera lenge dokona poropeta akali andete kisima (400) kuini Jesapeleme paka pyao sipyamo karaminyi dupwa lanyuo epena leya.

<sup>20</sup> Leyamosa kinji Ayapeme Isaraele wambu peparaee dee mee bange anatu kingi Bealo lenge dokona poropeta akali dupwa peparaee yuu kyau Kamele lenge dokona kee lao nyuo sukusa sukusa piya. <sup>21</sup> Dokopa Ilainjame wambu dupwa peteyaminyi dokona papala dopa leya. Nakama suu pingi lama manjo karo anjokorape mendaki palyaramisi? Kamongo doko Anatu ramo baa lakandalapape. Dee Bealo doko Anatu ramo baa lakandalapape, leya. Dopa leyamopape wambu dupwame pii kuki mende laa nayami. <sup>22</sup> Dokopa Ilainjame lao, Nakama mee bange anatu lao lakandenge kingi Bealo lenge poropeta akali malu (450) karaminyi. Dopa pipyamopape Kamongona poropeta dokona namba iki pyarepala pupyamo karo, leya. <sup>23</sup> Lapala mena bulamakao kali lama nyelapape. Nyepala mende mee bange anatu lenge kingi Bealo dokona poropeta akali dupwana mende nyuo pyao kunjo kuki kuki pipala isa dokona ketae retapala isare kaiyuo palya nana. Namba mena bulamakao kali mende dokome dopako piru, leya. <sup>24</sup> Dokopa mee bange kingi Bealo anatu lao lakandenge poropeta dupwame nakamana anatu doko kando atenja larami. Laraminyi dokopa namba Kamongo kando atenja

lao. Dokopa mendeme isingi yano pyakalyoŋo lao isare jera doko baa Anatuŋu, leya.

Dokopa wambu peparaeme isingi lao, Doko ka-pana, leyami.

<sup>25</sup> Lapala dee Ilainjame mee bange Bealo lakan-denge poropeta dupwa kando lao, Nakama malu dokona mena kali doko nyepala wambo rapa rapa pipwape. Pipala isa dokona isare kaiyuo palya napala nakamana mee bange anatu kando atena lalapape, leya.

<sup>26</sup> Leyamo dokopa nakamana mena minyakamyuo epeyaminyi doko nyepala wambo rapa rapa piyami. Pipala mee bange anatu kingi Bealo lenge doko kando atena lao kareyaminyi pao yuu kwuaya. Dopa piyasa nakama pii ketae lao, Bealo namwa kando isingi yano pyakape, lao kana pyare leyaminyi dokona awali lao mee wamya lyuo lao kareyami. Kareyaminyipape mee bange anatu kingi Bealo dokona piso isingi mende laa naya.

<sup>27</sup> Dokopa yuu gii korokama dokopa Ilainjame mee bange anatu kingi Bealo dokona poropeta dupwa kando minyak pyuo mora pii lao lao anatu Bealo dokona atena poraiyuo pyalapape. Mende ramo baa korakama kombeya pilyamo panda mee kamanda pase panda baa kata londe mendasa pupyase. Panda baa luu palase dokona nakamame baa pyaleta minyalyuo nyeraminyi, leya. <sup>28</sup> Leyamo dokopa poropeta dupwame atena pii ketae lao wamba mena pyao kiso maiyuo yulu palenge doko suu pyao wua kema dupwame nakama range poko pyao kareyaminyi pao ranjama epeya. <sup>29</sup> Epeyamo dokopa nakama

pii kara pao ketae lao dee pii koo kae lao lao kareyaminyi pao alemanji ingiya. Ingiyamopape atena isingi yano pyaope mende pii naya dee pii kuki mendepe leyamo siyaminde daako.

<sup>30</sup> Dokopa Ilainjame wambu dupwa kando lao, Namba karo dakena repeta epena, leya. Leyamosa wambu peparae baa kareya dokona pao malu palyiyami. Dokopa baame Kamongona kana pyare lasi wambarae kwaeyamo doko kamba rolo pyare lao wasiya. <sup>31</sup> Wasapala dokopa Kamongo dokome kingi Isaraele akali Jekope lao maiyamo dokona para piyamo rara akalisa ipisu lama (12) dusipana mendaki mendaki lao baame kana akalisa ipisu lamako (12) nyiya. <sup>32</sup> Nyepala kana dusipame Kamongo mena pyao kiso maiyuo lakandenge kana pyare lasi doko kamba pyare lao piya. Pipala suu nyuo awali leya. Doo suu nyiyamo dokona ipwa bakete lama make lita akalisa ipisu kisima ingyuo kulimbwaramo doko kapa isa pao serana lao piya. <sup>33</sup> Dopa pipala enakana kana pyare lasi dokona isa ketae reteya. Retapala mena doko pyao kunjo kuki kuki pipala isa dokona ketae lambuo lae pyuo reteya. Retapala baame lao, Ipwa pee kuki kisima kamuo simbwapala kulimbuo mena dokona piso dee isa dokona piso pinya, leya. Leyamuli pyuo piyami. <sup>34</sup> Dokopa baame lao, Kambako pinya, leya. Leyamosa kambako piyami. Dokopa yuu mendaki kamba konda pyuo pinya, leya. Dokopa nakamame dopale piyami. <sup>35</sup> Dokopa ipwa doko kana pyare lasi dokona makando lupyapala suu nyisi dokona soo simbwaya.

<sup>36</sup> Dokopa mena pyao kiso maingi yuu gii

alemanji dokopa kana pyare lasi dokona poropeta Ilainja repeta papala atenja lao, O Kamongo, Jekope, Aisake, Aporakamemoo dusipana Anatu, namba embena kendemande yulu pyakange dokome embena mawa pii lapinyili pyuo dapwa pyakapu dokonape epapu emba Isaraele wambunya Anatuŋu laope pakanya palyuo lasaka pepe. <sup>37</sup> Isingi yano pyakape. Kamongo, isingi yano pyakape. Dokona lao wambu dapwame emba Kamongo Anatu nakama emba rangena ingyuo kamba kapu kyo nyiinyi dokoŋo lao soo nyinyale, leya.

<sup>38</sup> Leyamo dokopa Kamongo dokome isare isa peyamosa mena pyao kiso maiyamo dokope rao isa dupwape rao kana dupwape rao pipala mee yuu nyisa wangu dupwana rapala ipwa suu nyuo awali lasinya siyamo dupwa sokwapala olo rali piya. <sup>39</sup> Doko wambu dupwame kandapala nakama yuu dokona pangu sepala lao, Kamongo doko Anatu. Kamongo baa iki doko Anatu, leyami.

<sup>40</sup> Dokopa Ilainjame mee bange kingi Bealo lakandenge poropeta dupwana mendalipi nyisa paa nana lao nakamame minyarapala pyao nyinya leya. Dokopa wambu dupwame pyao nyiyaminyi dokopa Ilainjame yuu ipwa Kisone dokona minyuo papala peparae pyao kumakaya.

### *Panyi Pyuo Otapala Apu Epeya*

<sup>41</sup> Dokopa enakana Ilainjame kiŋi Ayape lamaiyuo lao, Namba apunda repeta oo lao ipyamo silyuŋu. Epapu emba nenge nala puu, leya. <sup>42</sup> Dopa leyamo dokopa Ayape baa nenge nala peyamopa Ilainja baa yuu kyau Kamele lenge

dokona ketae pulyuo peya. Papala wapambu karapala banya ayemba ponga nao mona kando peteya. <sup>43</sup> Pisipala banya kendemande akali mende lamaiyuo lao, Papala ipwa kota dorena kandena, leya.

Leyamosa kendemande akali dokome pao kandapala dee kapu kyo epo lao, Namba bange mende kanda nalyo, leya. Dokopa Ilainjame yuu yanda ipingi nyepo kandala penako leya. <sup>44</sup> Yuu yanda ipingi dokona kendemande akali doko pao kapu kyo epapala lao, Ipwa kota dokona piso kopa kuki lama sipyamo kandapu doko andake daa mee akalinya kingi dopale ingyuo sipyamo kandalono, leya.

Dokopa Ilainjame kendemande akali doko lamaiyuo lao, Kiji Ayape baa apu dokome kata rokwasaraja banya mena osem ipyuo papingi uliuli doko nyepala apu epa nalyamo dakepa wambo anda piso pena lena, leya.

<sup>45</sup> Leyamo dokopa yuu gii kuki lamana aopa kopa dupwa pupuro kondo kondo lapala yake yambe pyao dee poo raiya minyapala apu reeko kanda soo epeya. Dokopa kiji Ayape banya mena osem ipyuo papingi uliuli doko nyepala yuu Jeserele dokona kapu kyo anda range peya. <sup>46</sup> Dokopa Anatunya porainya renga dokome Ilainja keta epeyamopa kandokondali pyuo banya komau awali lao gii lao wapupala kiji Ayape peyamo dokona baa wambo makando kata pao yuu Jeserele kame kambu dokona peya.

*Ilainja Yuu Kyau Sainai Lenge  
Dokona Kareya*

<sup>1</sup> Kiji Ayapeme Ilainja baame yulu peparae pyuo mee bange kingi Bealo lenge anatu lao lakandenge poropeta dupwa peparae pyao kumakao piyamo dokona lao banya etenge Jesapele lenge doko lamaiya. <sup>2</sup> Dokopa enda dokome Ilainja peteyamo dokona pii wai nembapala lao, Embame poropeta dupwa pyapi doko suu pyao epapu rakyape mende nambame emba pyaa naramo dokopa mee bange anatu dupwame namba kumungi dokona pyambuo pinya, leya. <sup>3</sup> Leyamo pii doko Ilainja soo pakapala baa range kyawa lete nyuo banya kendemande akali doko nyepala pakao yuu Biasipa yuu Juta singi dokona peya.

Papala banya kendemande akali doko dokona karena lapala <sup>4</sup> Ilainja yuu gii mendaki yuu muiyane mendena kata pao kareya. Pao karo isa renge rau leya mendena imambu soo peteya. Piso dokopa baa kumuowane lao suu piya. Pyapala baame atenja lao, Kamongo namba keta kenda palamo. Namba kumaro doko kapanja. Nambana lete karenge doko nyepe, leya.

<sup>5</sup> Lapala baa isa renge dokona luu paleya dokopa aopa anjala mendeme baa epo minyandapala lenge rapala nenge nena, leya. <sup>6</sup> Leyamosa lenge rapala kandeyamo dokopa kyawa reteya dokona borete mende soo dee pee mendena ipwa kamusi piso piyamo kandeya. Dolapo napala dee kambako luu paleya. <sup>7</sup> Paleyamo dokopa Kamongona anjala doko yuu lapo ingyuo epo pyalerapala lamaiyuo, Kata parene doko londe ingyasaranja lenge rapala nenge ipwape dupwa

nena, leya. <sup>8</sup> Dokopa Ilainja lenge rapala nenge ipwape duwpa neya. Nenge neyamo dokome baa kapa sikya pyuo poraiyamopa yuu gii akalisa kisima kata pao karo pao yuu kyau poo pyasi Sainai dokona para ingiyamopa peya. <sup>9</sup> Papala kukwa dokopa kananda mendena pao paleya.

Dokopa aopa Kamongo dokome pii lamaiyuo, Ilainja emba dakena apa pilisi? leya.

<sup>10</sup> Ilainjame isingi lao, Kamongo Anatu Porai Wakasa, namba embena yulu keyange pyakange kandale. Dopa pipunupape Isaraele wambu dupwame embena poropeta dupwa pyao kumakao embena tembole andana kiso maingi kana pyare lasi dupwa lalyinyi nembo dee embapa lao pii kana minyuo lalu lao leyaminyi doko kokwa soo pimi dokona namba yeelyo karapunupa pyao kumakamwali lao suu pilyaminyi, leya.

<sup>11</sup> Leyamo dokopa Kamongo dokome baa lamaiyuo, lao, Papala nambana lenge kambu dorena yuu kyau dokona karape, leya. Dokopa enakana Kamongome ama poo raiya andake mende peeyamosa yuu kyau dupwa poro lao rali pipala kana dupwa lakao mumu piya. Piyamopape Kamongo baa poo raiya dokona kara naya. Dee enakana poo raiya minyuo oteya dokopa dee yuusili minyiya. Minyiyamopape Kamongo baa yuusili dokona kara naya. <sup>12</sup> Yuusili minyuo otapeyamo dokopa enakana isare reya. Reyamopape Kamongo baa isare dokona kara nayako. Isare rao oteyamo dokopa isa isa pii mende elya kalo leya.

<sup>13</sup> Pii doko Ilainja sepala banya komau dokome lenge kambu yambe pyapala kananda kambu ko-



nandowame dokona karala peya. Dokopa pii dokome baa lamaiyuo, Ilainja emba dakena apa pyuo karese? leya.

<sup>14</sup> Ilainjame isingi lao, Kamongo Anatu Porai Wakasa, namba embena yulu iki pyakange kandle. Dopa pipunupape Isaraele wambu dupwame embena poropeta dupwa pyao kumakao embena tembole andana kiso maingi kana pyare lasi dupwa lalyinyi nembo dee embapa lao pii kana minyuo lalu lao leyami doko kokwa soo pimi dokona namba yeelyo karapunupa pyao kumakamwali lao suu pilyaminyi, leya.

<sup>15</sup> Dokopa Kamongome lao, Kapu kyo yuu Damasakesa repeta yuu muiyane dokona pupi. Papala yuu taone andake dokona sukusa pao akali Aseyele lenge baa Siria wambunya kinji ingyuo rombo palyape. <sup>16</sup> Palyapala Nimisinya ikinyingi akali Jiyu baa Isaraele wambunya kinji ingyuo rombo palyuo dee Sapatena ikinyingi akali Ilaisa yuu Epolo Meyola range doko opetae poropeta ingyuo embena panda nyeraņa rombo palyuo pepe. <sup>17</sup> Pipala wambu mendali kinji Aseyele dokome randa maiyuo pyao kumaka nara ramo doko kinji Jiyumi pyao kumakara. Dee wambu mendali Jiyumi pyaa nara ramo doko Ilaisame pyao kumakara. <sup>18</sup> Dopa piramopape wambu malu (7,000) namba rape rape lao yaki nyii napala isa bange kingi Bealo lenge lakanda nao dee bange kingimi wasisi lakandenge doko nyinyi pii nao karaminyi dupwa yuu Isaraele dokona mee lete petena kaeyaro, leya.

*Ilainjame Ilaisa Rombo Palyiya*

19 Dokopa Ilainja yaki nyuo Ilaisa koto kandalala peya. Kandeyamo dokopa mena okese lapo minyuo yuu ape ape pyao kareya. Kareyamo dokona mena okese gurupu akalisa ipisu mendaki wambo pyuo peyaminyipa baa mende enakaya dokopa dokona ape ape pyao peya. Dopa piyamo dokopa Ilainjame banya komau londe doko roko nyepala Ilaisa wapwakamiya. 20 Dokopa Ilaisa banya mena okese dupwa yaki nyepala Ilainja peyamo dokona makando papala lao, Enakana embapa role pyao bonalenge. Nambana anyi rakanepa yako lao nyinyi pyuo karena larowale, leya.

Dokopa Ilainjame isingi lao, Kapaŋa nambame emba kaeya laa nalyo. Kapu kyo pupi, leya. 21 Leyamo dokopa Ilaisa kapu kyo papala banya mena dupwa piya. Pyapala mena angi dupwa mange dokona isa mamando palenge dokome kisiya. Dopa pipala mena angi kisiyamo dupwa banya wambu dupwa nena lao maiyamopa nakama neyami. Enakana baame Ilainja nyiso yulu piru lao Ilainja peyamuli pyuo peya.

*20:1-43 Siria range kiŋi Benatate yuu Isaraele dokona taone mupwa singi Samaria lenge doko nyelana lao piya. Piyamopape Isaraelena kiŋi Ayape baame Siria wambu dupwa yuu lamasa pyao anamasi minyiya. Dopa piyamopape poropeta akali mendeme Ayapeme Benatate kyawa lete nyuo nyisiyamosa baa kumaramo doko nolako lao leya.*

## 21

*Akali Napotena Isa Girapo Ee Doko*

<sup>1</sup> Yuu Jeserele dokona kinji Ayapena anda kambu repeta dokona akali Napote lenge dokona isa girapo ee andenge. <sup>2</sup> Yuu gii mendepa Ayapeme Napote lamaiyuo lao, Embena isa girapo ee yuu doko nambana anda kambu repeta singi dokona namba anane kapisupi lapo wara pinyanja yuu doko namba nyerowale. Nyepala nambame emba girapo ee wakale mende jero. Panda range rae mai nare ramo doko nambame emba bange keyange lapo joo ropo pyao nyero, leya.

<sup>3</sup> Leyamo dokopa Napoteme isingi lao, Namba girapo ee dake nambana rora ambasu dupwana nyiyunju nambame emba nyii laro dokopa Kamongo dokome daa lena, leya.

<sup>4</sup> Ayape baa Napoteme pii lamaiyamo doko sepala ama mona kendo dee imbumi kumuo anda peya. Papala nenge naa nao banya luu palenge rate dokona papala lenge kambu apya dorena pyambwapala palyuo siya. <sup>5</sup> Dokopa banya etenge Jesapele papala piso soo lao, Akipamo emba nenge naa nao mona randame kumuo silisi? leya.

<sup>6</sup> Ayapeme isingi lao, Namba Napotena isa girapo ee doko ropo pyao nyero panda baa range rae mai nara ramo doko nambame ee wakale maiyuo banya ee dokona nyero lapu dokopa baame namba daa langipyamo dokona dopa pyuo peto, leya. <sup>7</sup> Leyamo dokopa Jesapeleme isingi lao, Kapa emba kinji panda kinji daase? Rate dokona sipuro epo mona kare kare rae maiyuo piso nenge nape. Nambame Napotena isa girapo ee doko nyakaronjo, leya.

<sup>8</sup> Lapala enakana enda baame Ayapena kingi palyuo pepa mende pyapala waa lumbuo kandasarami lapala make mende ketae pisiya. Pisapala yuu Jeserele akali mupwa dupwape wambu lita ingyuo karengge dupwape maiya. <sup>9</sup> Maiyamo pepa dokona dopa lao piya. Wambu dupwa kee lao nyuo malu palyapala nenge wasaka pyuo piso Napote baa kingi ketae pyambuo lakandalapape, leya. <sup>10</sup> Lapala orasakele akali lama nyepala baa kooŋo lapala Anatunya lengge kambupi kiŋinya lengge kambupi dolapona kokwa soo pipi lena. Lapala yuu taone dokona baa minyuo nyisa papala kaname pyao kumakalapape, leya.

<sup>11</sup> Dokopa yuu Jeserele dokona akali mupwa dupwape wambu lita ingyuo karengge dupwapeme enda Jesapeleme pinya leyamuli pyuo piyami. <sup>12</sup> Nakamame wambu dupwa nyuo malu palyuo nenge wasaka pyuo piso Napote baa kingi ketae pyambuo lakandeyami. <sup>13</sup> Lapala orasakele akali dolapome baa kooŋo Anatunya lengge kambupi dee kiŋinya lengge kambupi dolapona kokwa soo pipya leyambi dokopa yuu taone dokona Napote minyuo nyisa papala kaname pyao kumakayami. <sup>14</sup> Dokopa Napote pyao kumakalyamo lao Jesapele peteyamo dokona pii wai nembeyami.

<sup>15</sup> Pii wai doko Jesapele sepala aopa dokopako Ayape lamaiyuo, Napote baa kumapyaŋa dokona lao banya isa girapo ee yuu emba jelana simbi simbi piyamo doko emba nyela puu, leya. <sup>16</sup> Yuu gii mendaki dokopako Ayape ee doko nyela peya.

<sup>17</sup> Peyamo dokopa Kamongo dokome yuu Tisipi

range poropeta Ilainja lamaiyuo, <sup>18</sup> Yuu Samaria range kinji Ayapeme Napote isa girapo ee doko nyakaminya pilyamonjo baa petamo dokona puu. <sup>19</sup> Papala namba Kamongo dokome lapyo lao baa lamaiyuo, Embame akali doko pyao kumakapala dokopa enakana banya ee doko emba nyerene keyangese? Nambame dapa lapyo lao, baa lamaipi. Suwa dupwame Napotena ranjama pendo naminyi yuu dokonako embena ranjama pendo narami lapyo lape, leya. <sup>20</sup> Ayapeme Ilainja kandapala dopa leya, Nambana nyisu petenge, embame namba minyarapala nyela epelese? leya.

Leyamo dokopa Ilainjame isingi lao, Emba Kamongona lenge kambu dorena emba rangeme koo pipala nyisa rekya lao pao otapi dokona waa nambame emba nyela epelyo. <sup>21</sup> Dokona lao Kamongome emba dopa langilyamo. Nambame emba keta randa andake jero. Doko embena ree palu dokona wane dupwa peparae kuki andapaepe mende pyarepala paa nana lao pyaro, lapyo. <sup>22</sup> Embame Isaraele wambu dupwa kata koono lanyuo pao koo pinya lao pipinyi dokona nambana imbu singi nyakaleneje embena ree palu dupwa kinji Jeropome Nepatena ikinyingi piyamo doko waiso dee kinji Basa Ainjana ikinyingi piyamo doko waiso pirami, lapyo. <sup>23</sup> Enda Jesapele dokona lao doko Kamongo dokome lao, Yuu taone Jeserele dokona banya yongo doko suwa dupwame narami lapyo, leya. <sup>24</sup> Dee embena wambu range lapo yuu taone dokona kumarami dupwa suwa dupwame narami dee wambu lapo mee neta dupwana kumarami dupwa yaka ketae papingi dupwame

narami, lapyá.

<sup>25</sup> (Banya etenge Jesapeleme kyawame suu lao piyamo dokome Kamongona lenge kambu dokona Ayape baame ama koo pyulu pyuo piya. Banya koo piyamo doko wakale dupwana mendeme isa palya nayami. <sup>26</sup> Kamongo dokome Isaraele wambunya lenge kambu dokona Amo wambu yulu koo elya pingi pyuo mee bange kingimi wasisi dupwa lakando kareyaminyi dupwa nyisa nembeya. Nakama koo pyuo kareyaminyili pyuo Ayapeme piya.)

<sup>27</sup> Ilainja pii lao otapeyamo dokopa kini Ayapeme banya komau doko minyuo kangunyi nembapala baa kumanda wapungi komau wapuo nenge naa nao mee luu palyuo baa mona randame kumuo peteya.

<sup>28</sup> Dokopa Kamongo dokome poropeta Ilainja lamaiyuo, <sup>29</sup> Epapu kini Ayape kandape. Namba kando inyimungu pisipyamo doko emba kandlese? Dopa pyuo karapyamo dokona nambame epapu baa lete karamo yuu gii dakepa baa keta randa mai naro. Rengya banya ikinyingi dupwa kararami yuu gii dokopape Ayape banya ree palu dupwape keta randa doko mairu, leya.

## 22

### *Poropeta Akali Maekaya Lenge Dokome Ayape Repe Repe Pii Lamaiya*

<sup>1</sup> Ee kana lamana Isaraele wambu dupwa Siria wambu pipya manda rao lambo lao mona siyamopa palu karo piyami. <sup>2</sup> Piyaminyipape ee kana repo dokona yuu Juta range kini

Jiosapatame Isaraele wambunya kini Ayape kandala peya. <sup>3</sup> Peyamo dokopa Ayapeme banya akali mupwa dupwa piso soo lao, Oramote yuu Giliate singi doko namwana doŋo. Akipamo namwame yuu Oramote yuu Giliate singi doko Siria wambunya kini rekyo lao nyerama lao mende pii nalyamase? leya. <sup>4</sup> Lapala Ayapeme Jiosapata kando lao, Emba namba role pyao Oramote wambu dupwa pyao nyela parambase? leya.

Dokopa Jiosapatame isingi lao, Nambape nambana yanda singipi dee yanda singi mena ose matana petengepe dupwa rapa rapa pyuo otapunu. Dusipa peparae emba rangena ingilyamo, leya. <sup>5</sup> Dopa piramopape wambo Kamongo doko keta kapa lao piso soo kandamanale, leya.

<sup>6</sup> Dokona lao Ayapeme poropeta akali andete kisima (400) epena lapala piso soo lao, Nambame Oramote wambu dupwa kapa pyala paowa panda kaeyowase? leya. Leyamo dokopa isingi lao, Kamongome pyao wini pii lao emba keta embone kararanga kapa pyala pare, leyami.

<sup>7</sup> Leyaminyipape Jiosapatame piso soo lao, Kamongome apa letamo lao, poropeta mendali keta serama mende kara nalyase? leya.

<sup>8</sup> Dokopa Ayapeme isingi lao, Imilana ikinyingi poropeta Maekaya karamo. Karapyamopape baame namba rengya mende pira lao keyange dokona langya napala yuu peparae koo dupwanako langingi dokona nambame baa awa nalyo, leya.

Jiosapatame isingi lao, Emba dopa laa nare ingilyamo, leya.

<sup>9</sup> Leyasa kiŋi Ayapeme banya anda karengge akali mupwa mende kee lao nyepala yuu gii mendaki dakepako poropeta Maekaya nyela pena leya.

<sup>10</sup> Lapala kiŋi dolapo nakambana komau londe dupwa wapupala yuu Samaria kame nyisarena witi pyao injingi mare dokona nakambana petenge isa dokona peteyambinyipa poropeta dupwame nakambana lenge kambu siya dorena karo mende rengya pira dokona lamaipa pyuo kareyami. <sup>11</sup> Kareyaminyi dokopa akali mende Senanana ikinyingi Setekaya lenge dokome baa rangeme ane poraimi mena bulamakaona nenge yale wasiya. Wasapala Ayape lamaiyuo, Kamongo dokome bange dake minyuo Siria wambu dupwa doko kapa pyao ralinyi nembapala kaeyare letamo, leya. <sup>12</sup> Leyamo dokopa poropeta menge dupwa dokonako palyuo lao, Kamongo dokome porainya renge jeramopa Oramote wambu kararaminyi dokona pao nakama nyuo wini piri, leyami.

<sup>13</sup> Dopa pyuo kareyaminyipa akali mupwa poropeta Maekaya nyela peyamo dokome epo lao, Poropeta menge dupwame kiŋi doko rae mainyi pyambuo pii mendareko lami dopa pyuo emba dokonako ingyuo lape, leya.

<sup>14</sup> Leyamo dokopa Maekayame isingi lao, Kamongo lete karengge dokona lao lalu lao lao baame namba dopa laa lao langiramo doko laro, leya.

<sup>15</sup> Enakana baa kiŋi peteya dokona peyamo dokopa kiŋi dokome baa piso soo lao, Maekaya, kiŋi Jiosapata nambapame Oramote wambu dupwa pyala bwua panda kaeyambase? leya.



Dokopa Maekayame isingi lao, Kapa pupwa. Kamongo dokome embone kareng'e jeramopa nakambame pyao anda pisirambi, leya.

<sup>16</sup> Leyamo dokopa Ayapeme isingi lao, Kamongo dokona kingi lao embame namba pii kinyi dokona iki langi. Yuu akipare nambame emba dopa pii lao langirusi? leya.

<sup>17</sup> Maekayame isingi lao, Isaraele ami yanda singi dupwa mena sipisipi rapu pingi kara nalyaminyi ralo kareng'e dopale ingyuo yuu kyau dupwana wakale wakale ralo pao karaminyi kandeyo. Dokopa Kamongo dokome lao, Wambu dupwana rapu pingi akali mupwa mende kara nange lamoŋo dokona mee mona seramo anda pena lapyo, leya.

<sup>18</sup> Dokopa Ayapeme Jiosapata lamaiyuo, Baame namba keta keyange piran̄a lao langi napala yuu peparae koo dokonako langinginj̄i lao emba langya napu kandapisi? leya.

<sup>19</sup> Leyamo dokopa Maekayame deeyako lao, Epapu Kamongo dokome apa letamo lao sepe. Kamongo doko yake panda dokona banya petenge isa dokona pisipyamo banya an̄ala dupwa baa pisipyamo wangusa karaminyi kandapu.

<sup>20</sup> Dokopa Kamongo dokome piso soo, Apimi Ayape baa yuu Oramote dokona papala kumara lao minyako pela parase? leya. Leyamo dokopa an̄ala lapome pii mendakinya palyuo leyami dee lapome mendena palyuo leyami. <sup>21</sup> Lao peteyaminyipa imambu mende epo Kamongo peteyamo dokona papala akali doko nambame minyako pela paro, leya. <sup>22</sup> Leyamo dokopa Kamongome piso soo lao, Apa pyuo pirisi? leya.

Dokopa imambu dokome isingi lao, Nambame papala Ayapena poropeta akali dupwa kyambo lena lao kunji pyaro, leya. Dokopa Kamongo dokome lao, Emba wini piriñi baa minyako pela puu, leya.

<sup>23</sup> Dokopa Maekayame lao oto lao dopa leya. Dopa pipya lyakande. Kamongo dokome em-bena poropeta dapwa kando kyambo lena lao kunji pyapya. Dopa pipyamopape Kamongo baa rangeme emba koo keta palyuo lapyo, leya.

<sup>24</sup> Leyamo dokopa poropeta akali Setekaya doko Maekaya kareya dokona papala Maekayana lenge kambu dokona rakyuo pyao lao, Kamongona Imambu dokome namba yaki nyuo epo apa pyuo emba pii kanda soo langilyase? leya.

<sup>25</sup> Leyamo dokopa Maekayame isingi lao, Emba panda kuki matarena dokona yalu pela pare dokopa koto kandare, leya.

<sup>26</sup> Dokopa kiñi Ayapeme banya akali mupwa dokona mende lamaiyuo, Maekaya minyarapala nyepala yuu taone andake dokona gapomane akali mupwa Amonepa dee kiñinya ikinyingi kingi Joasepa minyuo pao maipi. <sup>27</sup> Maipala dokopa nakamba lamaiyuo, Baa karapusi anda palya-pala nenge borete ipwape iki maiyuo karena lare. Dopa pyuo kararaminyipa namba kapa lete eparo, leya.

<sup>28</sup> Dokopa Maekayame pii poraiyuo lao, Wambu peparaeme nambana pii selapape. Ayape, emba lete anda kapu kyo epare ramo dokoyaka Kamongo dokome namba keta pii langya napyalyamo lao kandaro, leya.

### *Ayape Kumuyamo Doko*

<sup>29</sup> Isaraele wambunya kinji Ayapepa Juta wambunya kinji Jiosapatapame yuu Giliate dokona Oramote wambu dupwa pyala peyambi.

<sup>30</sup> Ayapeme Jiosapata lamaiyuo, Emba yanda pela paramba dokopa kinji komau dupwa wapupala kinji ingyuo pupi. Dopa pirinyipa namba wambu dupwame nambaŋa lao kanda seramiŋi namba komau wakale wapupala paro, leya. Lapala Isaraele kinji doko alowa pyuo wakale ingyuo yanda pela peya.

<sup>31</sup> Peyamo dokopa Siria wambunya kinji dokome akali banya mena osemi ipyuo papingi uliuli dupwa rapu pyuo karengi dupwa pii poraiyuo lamaiyuo, Akali kuki andakepe dupwa pyaa napala Isaraele kinji doko iki pinya leya. <sup>32</sup> Dokopa nakamame kinji Jiosapata epeyamo doko kandapala Isaraele kinji dokoŋo lao peparaeme suu piyami. Suu pyapala pyala peyami dokopa baa pii ketae lao ee leya. <sup>33</sup> Ee leyamo dokome doko Isaraele kinji doko daalyamo lao sepala pyala peyaminyi doko kaeyami. <sup>34</sup> Kaeyaminyipape Siria yanda singi dokona mendeme banya kakumi mee kamenge piyamopa papala kinji Ayapena ane komau porai kimbuso kii pingi dokona pisipala pao anju rengi dokona peteya. Peteyamosa akali banya mena osemi ipyuo papingi uliuli yulu minyuo penge doko kando ee poraiyuo lapala, Namba kandape. Namba pisipilyamoŋo yanda dakena yaki nyuo ipyuo minyuo nyisa pupi, leya.

<sup>35</sup> Yuu gii dokopa yanda andeyamosa kinji Ayape baa Siria range kareyami dorena lenge kambu pyambwaro banya mena osemi ipyuo papingi

uliuli dokona bange lapome pyare lapala peteya. Peteyamopa kaku peteya dokona ranjama dupwa epo karo uliuli panda isarena raeyo siya. Dokpa kukwama baa kumuya. <sup>36</sup> Neta anda repeta para ingiyamo dokopa Isaraele yanda singi kareyaminyi dokona pii mende lao sukusa pao akali peparae nakamana taone yuupi dupwana kapu kyo pena, leya.

<sup>37</sup> Dopa pyuo kinji Ayape kumuya. Banya yongo doko minyuo pao yuu Samaria dokona malu piyami. <sup>38</sup> Kamongome pira leyamuli pyuo banya uliuli doko minyuo pao ipwa Samaria pete dokona wate piyami dokopa ranjama dupwa suwa dupwame pendo nao dee pamuku enda dupwame dokona wate pyuo piyami.

<sup>39</sup> Yulu peparae kinji Ayape piyamopa anda ama keyange piyamo pe dee yuu taone kareng wasiyamo pe dupwana lao Isaraele Kinji Dupwana Arome Pii Buku dokona pyao reteyami. <sup>40</sup> Baa kumuyamo dokopa banya panda nyuo ikinyingi Ayasaya lenge doko kinji kareya.

*22:41-53 Jiosapata baa kinji Asana panda nyuo yuu Juta iso kareya. Dee Ayasaya baa kinji Ayapena panda nyuo yuu Isaraele iso kareya.*

**BUKU BAEMOLE**  
**The Shorter Bible (New Testament and selected**  
**portions of the Old Testament) in the Kyaka Enga**  
**language of Papua New Guinea**  
**Buk Baibel long tokples Kyaka Enga**

Copyright © 1973, 1980, 1987 The Bible Society of Papua New Guinea

© Faith Comes by Hearing

Language: Kyaka Enja (Kyaka Enga)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

---

PDF generated using Haiola and XeLaTeX on 21 Feb 2024 from source files dated 31 Aug 2023

8949d805-1f35-50b7-ae5d-683fec0bae65